

IBELIU

Leta de'e me Ibeliu faifaidi.

De'e letanina me Diu faifaidi kumanidiavo i vetumaganaga Iesu Keliso 'waineye. Bonadi 'ana wagava Ibeliu begaidi ta golegoledi ta vo, Me Ibeliu.” We'e de'e letanina 'ana tokiluma kebu ta da 'asetaiqa aitoi i kilumi.

Fai me Ibeliu tovetumagana vita i veveluagadi Iesu 'ana tovedumwe'ai'ai 'waidieqa nuanuadi i na viladi yadi tafalolo tuatuaina 'waineye. Begaidi de'e leta 'ana tokiluma i ve 'waidie i lubwainedi yadi tafalolo tuatuaina 'adi 'eda'eda i na bailedi, Iesu 'aiseotogina 'wainega i na ve'atumai Yaubada mataneye. Iesu taunina Yaubada Natuna bwaikaotogina we'e anelose, Yaubada yana tolu'ivonavo wata Mosese sai'afo. Wata i ve 'waidie tomotoga kebu 'adi fata i na ve'atumai Yaubada mataneye ve'etoboda 'adi vematayakayaka 'waidieqa 'alo velomu tulina tulina 'waidieqa. Iesu 'aiseotogina 'wainega Yaubada yada sakona i na 'u'umidi. Fai taunina yada Tovelomu Bwaikina faifaida i mia-vagata Yaubada 'ana 'atagieqa, i lubwaineda yada sauluva tuatuaidi ta na bailedi, yada vetumagana ta na yato-vagasedi Iesu 'waineye. De'e letanina 'ana 'idi side bani'odi.

Yaubada taunina i sivemageseni 'waideye Natuna 'wainega. 1:1-4

Keliso Yaubada yana anelose i vebwaika-'iawedi. 1:5–2:18

Keliso Mosese wata Iosua i vebwaika-'iawedi. 3:1–4:13

Keliso tovelomu i vebwaika-'iawedi. 4:14–7:28

Veakutagona 'Ivauna Keliso 'wainega Veakutagona Nagami i vebwaika-'iaweni. 8:1–9:28

Keliso dayagina 'aisaya dayagidi i vebwaika-'iawedi, 'eba velomunina 'ana fata yada sakona i na 'u'umidi. 10:1-39

Vetumagana 'aiseotogina 'wainega ta na ve'atumai. 11:1-40

Ma yada tokemaiga ta na vetumagana Keliso 'waineye wata ta na vematayakeyakeni. 12:1–13:19

Leta 'ana tokiluma yana 'alanuai. 13:20-25

Yaubada yana nuanua 'waideye, 'ana tosivemageta Iesu.

1 ¹Basenadiotoga Yaubada yana nuanua i veve tubudavo me Diu 'waidie. Tutuya fuedi 'eda'eda tulina tulina 'waidiega yana nuanua i sivemagesedi yana tolu'ivonavo 'waidie mulieta i lu'ivona tubudavo 'waidie. ²^aBasenadi de'e bani'odi i veifufuyedi siwe 'asiau bega i na nagoga tutuya 'ana 'eba ve'a'ava 'waineye i veifufu 'waideye Natuna 'wainega. Natunanina 'wainega nani matatabuna i 'idewadi abame wata fwayefwayeye, wata i venua'ivineni bega naninidi i 'idewadiga i na veveimeyedi. ³^bYaubada yana 'ai'aiwabu mataududulina 'anununa 'ada fata ta na 'iseni Natuna 'wainega. Natunanina Yaubada i sala-'afo'afai wata yana vona toketokena 'wainega nani matatabuna i kikiavefa'alidi wata i 'iisave'avinidi. We'e yana wafa 'wainega tomotoga yada sakona i lekoa'a'avadi mulieta ma yana veimea i miabui abame, Yaubada Toketokeotogina 'ana 'atagiega. ⁴^cMa yana veimea i miabui bega taunina bwaikaotogina we'e anelose sai'afu. We'e 'ana 'eba 'ainana Yaubada Natuna, wagavanina bwaikaotogina kebu anelose 'adi wagava bani'odi.

Yaubada Natuna bwaikaotogina kebu anelose bani'odi.

⁵^dVona mogitana ta 'asetai Yaubada Natuna bwaikaotogina fai basenadiotoga i kilumi Yaubada yana Buki 'waineye faifaina. Yaubada i vona Natuna 'waineye i vo,

'Omu Natuku,

'Asiau fai yau Tamamu veimea a velemu.”

We'e kebu tamu tutuya de'e bani'odi i da voneyedi anelose 'waidie. Wata tamu tutuya Yaubada i vona Natuna faifaina i vo,

Yau Tamana,

We'e taunina Natuku.”

⁶^eYaubada Natuna kumanina nani matatabuna 'adi to'edakumeta, sai'afoga i na vetunei i na mai fwayefwayeye, faifaina i vona i vo,

Yaku anelose matatabudi, i lubwainedi ma yadi subia i na 'odu'odu 'waineye.”

⁷^fTa 'asetai anelose tomotoga bwaikidi fai Yaubada i vona faifaidi i vo,

Yaku anelose a 'idewadi, yadi lilide kaukau bani'odi,

Taunidi yaku tofолоvavo 'ai-'ala'alata bani'odi.”

⁸^gWe'e Natuna fai bwaikaotogina bega faifaina i vo,

'Omu Yaubada, yamu 'Eba Veimea kebu 'ana 'eba ve'a'avaga i na 'eno-vagata.

'U veveimea, veimea tonovidi 'waidiega.

⁹Sauluva tonovidi nuanuamu bwaikina, we'e sakona 'u vedumwe'ai'aieni.

^a 1:2 1 Fit 1:10; Kol 1:16 ^b 1:3 2 Kol 4:4; Kol 1:15; Ibu 8:1-2 ^c 1:4 Fil 2:9

^d 1:5 Same 2:7; Ibu 5:5 ^e 1:6 Luk 2:13-14 ^f 1:7 Same 104:4 ^g 1:8-9 Same 45:6-7

Begaidi yau yamu Yaubada a vena'ivinemu a silakaimu, wata veimea bwaikina a velemu, 'amu kiavesosoana.

We'e emwavo 'adi ve'ililibu sai'afo."

¹⁰hWata Yaubada i vona Natuna 'waineye i vo,

'Omu Toveimea, 'eba velamu 'waineye fwayafwaya 'u 'idewai,

Wata nimamuyega nani matatabuna abame i souyedi.

¹¹⁻¹²Naninidi 'a'a'avidi i na savovola, we'e 'omu 'u na mia-vagata.

I na venani-'avo'avovo kaleko tuatuaina bani'odi.

Tomotoga kaleko tuatuaina i na sakoga i na nunumi i na taweni, ma'itufa 'ivauna i na 'ewai.

Wata bani'odi fwayafwaya abama taiadi 'u na nunumidi we'e 'ivaudi i na souyedi.

We'e 'omu, 'asa'aiana 'amu 'isa'isanina, kebu 'u na vetuataiga."

¹³iWata tamu tutuya Yaubada i vona Natuna 'waineye i vo,

Veimea a velemuga bega 'u na miabui 'aku 'atagiega,

I na nagoga 'amu gaviavo a na leodi bega 'u na veveimeyedi."

We'e kebu tamu tutuya de'e bani'odi i da voneyedi anelose 'waidie.

¹⁴jVetuma anelose egavo? Taunidi 'anu'anunu, Yaubada yana tofolovavo i vevetunedi bega egavo 'ita'ita'i i na veluagaiga i 'i'ivaisedi.

'Ada 'ita'ita'i kebu ta na baileniga.

2 ¹Fai Yaubada i veifufu 'waideye Natuna 'wainega, 'ida yana vona ta nogaidiga i lubwaineda ta na nunuave'avinidi. We'e 'ai'edi kebu, yana vonanidi ta na baibaileidi bani'odi malolo ma'inuana waka i bewebeweni. ²kBasenadiotoga Yaubada yana veimea i 'anivelenedi Mosese 'waineye anelose 'waidiega, we'e tomotoga fueidi i 'asetai veimeanidi vona mogitana. Egavo i geugeudi kebu i da vematayakeyakediga vematavuloga i veluagai 'adi laubwaina. ³Tutuya de'e 'ada Toveimea Iesu tauniotogina 'ita'ita'i 'ana 'eda'eda i lu'ivona tomotoga 'waidie. Tomotoga 'ifwaidi yana lu'ivonanina i nogai mulieta faifaina i ve 'waideye, bega ta 'asetai vona mogitana. 'Ita'ita'inina Iesu 'wainega nani bwaikaotogina begaidi 'ai'edi ta na baileniga kebu 'ada fata 'ada vematavuloga ta na degeni. ⁴lTomotoganidi Iesu yana vona i nogaiga i lulu'ivona, wata yadi lu'ivonanina Yaubada i awavemogitaneni fai toketokena i veledi bega 'adi fata 'eba nuavogana wata 'eba nua'ewa tulina tulina, wata 'eba 'isa toketokedi i na 'i'idewadi. Wata bani'odi yana nuanuayega nuakalikali tulina tulina 'Anu'anunu 'Atumaina 'wainega i veutada. Nuakalikalinidi 'ida tovetumaganavo 'ada 'eba 'aivaita.

^h 1:10-12 Same 102:25-27 ⁱ 1:13 Same 110:1 ^j 1:14 Same 91:11; Fol 12:7

^k 2:2-3 Ibu 12:25 ^l 2:4 Mak 16:20

Iesu nani matatabuna 'adi Toveimea.

⁵Yaubada anelose kebu i da tauyedi bega i na vetoveimea fwayafwaya 'ivauna 'awaie i na souyeniga 'waineye. A vonavona tutuya mulina faifaina. ⁶ Vona mogitana kebu anelose i da tauyediga we'e basenadiotoga tamu aitoi i kiluma Yaubada yana Buki 'waineye i vo, Yaubada, 'ima tomia fwayafwaya nani-'avo'avovo, siwe 'u nuanuana. 'Ima tomotogaotoga siwe 'u 'i'isave'avinima.

⁷⁻⁸ "Mogitana 'ima nani-'avo'avovo siwe 'u silakaima bega 'ima sai'afo nani bwaikina, we'e anelose bwaikidi.

'U silakaima kini bani'odi, 'ai'aiwabu 'u velema, ma 'ama ve'ililibu, Wata 'u tauyema nani matatabuna 'a veveimeyedi."

I vonaga Yaubada tomotoga i tauyedi nani matatabuna i veveimeyedi bega ta 'asetai kebu tamu nani i da ve'o'oleni. Siwe tutuya de'e kebu ta da 'iseni tomotoga nani matatabuna i da veveimeyediga. ⁹ We'e mogitana tamu tomotoga ta 'iseni, taunina Iesu, nani matatabuna 'akonadi i veveimeyedi. Nagami bwaikaotogina, mulieta tutuya 'ale'usana faifaina Yaubada i kiaobuyeni bega i obuma ma'itufa anelose i kumeta. I obumaga Yaubada yana nuakalikali kebu nuana i da loloiga bega i wafa tomotoga matatabuda faifaida. Fai wafa 'ana veviga sakoina i veluagai faifaida, Yaubada i silakai i ve-Kini, 'ai'aiwabu magemagetana wata ve'ililibu i veleni bega 'asiau ta 'iseni nani matatabuna i veveimeyedi.

Tatada Iesu 'ana fata i na 'ivaiseda.

¹⁰ Fai Yaubada nuanuana, bega nani matatabuna i 'idewadiga i 'i'isave'avinidi, wata nuanuana tomotoga fuedi 'ita'ita'i i na veluagai i na luku yana mageta mataududulina 'waineye. Bega Iesu i vetuneiga i lubwaineni, yana veviga wata yana wafa 'waidiega Yaubada Iesu yana veimea i 'imoso'ieni, bega taunina 'ada To'edakumeta 'atumai'avana, 'ana fataotoga i na 'ita'ita'ieda bega 'ida Yaubada natunavo. ¹¹ Iesu 'ida tomotoga i 'ive'atumaida Yaubada mataneye, bega 'ida wata taunina 'ada To'ive'atumai, ma fueda Tamada 'aitamogana. Avinodi taunina Yaubada Natuna bwaikaotogina siwe kebu i da bunumayageda fai i 'ive'atumaida i veve'awa-taikwavo 'waideye. ¹² 'Kebu i da bunumayagedaga begaidi Yaubada yana Buki 'waineye i vo,

Yaubada, faifaimu a na veifufu taikwavo 'waidie, Tutuyanina i na vava'autaga, matadie a na lei-subisubia 'waimuye."

¹³ Wata i vo,

Yaku vetumagana a na yatoy Yaubada 'waineye."

^m 2:6-8 Same 8:4-6 ⁿ 2:7-8 1 Kol 15:24-26 ^o 2:9 Fil 2:8-9 ^p 2:10 Ibu 5:8-9
^q 2:11 Mak 3:35 ^r 2:12 Same 22:22 ^s 2:13 Ais 8:17-18

Wata tamu tutuya Iesu i vo,

Yau de'e, Yaubada natunavo taiadi, kumanidiavo i veleku.”

¹⁴Yaubada natunavonidi vigo wata dayaga 'waidiega ta tubuga begaidi wata Iesu i tubuga i vetomotogaotoga 'ida bani'odi. I vetomotogaotogaga bega 'ana fata i na wafa tomotoga faifaida. Yana wafanina 'wainega Seitani, taunina wafa 'ana toveimea, yana toketokena i venani-'avo'avovo. ¹⁵Tomotoga fueidi yadi mia matatabuna 'waidie i kololo wafa faifaina, 'wa da vo yadi kololonina i da yogonidi, siwe Iesu i wafa wata i tovoivaitugana bega i yavudi kololonina 'wainega. ¹⁶Akonadi ta 'asetai Iesu kebu i da ve-anelose bega anelose i da 'ivaisedi, i vetomotogaotoga bega 'ida Ebelamo tubunavo i 'ivaiseda. ¹⁷Yaubada nuanuana i na 'ivaiseda bega Iesu i salada nani matatabuna 'waidie i lubwaineni. Fai yana mia 'ida tainavo bani'odi, i vetofolova Yaubada 'waineye taunina yada Tovelomu Bwaikina, i 'i'isanuakalikaleda bega 'ada fata ta na vetumagana 'waineye kebu i na baileda. Yana folovanina 'wainega tomotoga yada sakona Yaubada i nuatavunidi wata yana nuasako 'waideye i ve'a'avadi. ¹⁸Tutuyanina i miamia fwayefwayeye vita i veluagadi wata Seitani i silubuya nuanuana i na sakona siwe kebu i da be'uga, begaidi 'asiau 'ida vetalaimimila ta na veluagadiga, 'ana fata i na 'ivaiseda.

Mosese sai'afo, we'e Iesu bwaikaotogina.

3 ¹'Ekwavo, 'omi wata Yaubada i venua'ivinemiga yami sauluva 'atumai'avadi mataneye bega 'ami fata 'wa na luku abame. Mogitana Iesu 'ana fata i na 'i'ivaiseda begaidi i lubwaineda ta na nunua'ivina faifaina. Yaubada i vetunei i mai i vetovelomu bwaikina faifaida yada sakona i 'u'umidi bega tutuya fueidi faifaina ta lulu'ivona. ²Tutuyanina i miamia fwayefwayeye ma yana dumwebika i folova Yaubada faifaina, kumanina i venua'ivineni i vetovelomu bwaikina. Basenadi wata bani'odi Mosese ma yana dumwebika i folova Yaubada yana 'aila'a 'waidie, 'wa da vo yana vanuga matatabuna nageneye i da folova. ³Iesu yana folovanina faifaina Yaubada i silakai 'ai'aiwabu bwaikina i veleni we'e Mosese sai'afo, bani'odi to'aiyogona vanuga, taunina ta subisubiai we'e vanuga sai'afo. ⁴Vanuga 'aitamogana 'aitamogana kebu taunidi i da tovoi, tomotoga i yogonidi. We'e Yaubada nani matatabuna 'adi to'idewadewa. ⁵Mosese taunina Yaubada yana tofolova, i dumwebika Yaubada yana vanuga matatabuna nageneye, wata ava'ai Yaubada i sivemagesediga tolu'ivonavo wata Keliso 'waidiega, faifaidi nagami i vona-vagata. ⁶We'e Keliso kebu tofolova, taunina Yaubada Natuna ma yana dumwebika

† 2:14 1 Ion 3:8 † 2:17-18 Ibu 4:15; Mad 4:1-11 † 3:1 Ibu 4:14 † 3:2,5 Num 12:7
x 3:6 Ibu 3:14, 10:23

Yaubada yana vanuga i veveimeyeni. 'Ida tovetumaganavo 'asa'aiana yana vanuganina. 'Ai'edi ma yada venuafoufa'ala ta na tokemaigeda Iesu faifaina, wata ma yada vetumagana ta na lulukamata naninidi Yaubada i vona'awaufaufa i na veledaga, mogitana 'ida Yaubada yana vanuga.

Me Isileli Yaubada yana nuanua i vedumwe'ai'aieniga kebu ta na salad.

7-9^yMa yada venuafoufa'ala ta na tokemaigedaga fai Yaubada yana Buki nageneye 'Anu'anunu 'Atumaina i vonevonedu i vo,

'Ai'edi 'asiau Yaubada yana vona 'wa na nogaiga,

Kebu tanigami 'wa na 'ibodadi, 'wa na nogai 'wa na tononi.

Tubumiavo kebu 'wa na salad.

Basenadi i yabayaba sali'avu'avuye tanigadi i 'ibodadi wata yau yadi Yaubada i vedumwe'ai'aieku.

Bei sali'avu'avuye malamala 40 nagedie 'eba 'isa toketokedi a 'i'idewadi matadie i lubwainedi i da vematayakeyakeku, siwe yaku tokemaiga i silubuya yadi sauluva sakoidi 'waidiega,

¹⁰Fai i vedumwe'ai'aieku a nuasako 'waidie a vo,

Tutuya fuei yadi nuanua tulidiamo i nunago, yau kebu nuanuadi.”

¹¹^zBegaidi ma yaku nuasako a vona'awaufaufa a vo, Kebu tamu sai'afu i na luku 'awalawanina a tauyeniga 'waineye bega i na veawai 'waikuye.”

¹²Ekwavo, basenadiotoga tubumiavonidi tanigadi i 'ibodadi kebu i da luku mia 'atumaina 'waineye, we'e 'omi taunimi 'wa na 'i'isave'avinimi bega kebu nuanua sakoidi nuamie yami vetumagana i na 'ivesakodi i na nunago Yaubada Miamia-vagaina 'wa na vedumwe'ubu'ubuseni.

¹³Taunina tutuya i tauyeni tomotoga 'waideye bega bonana ta na nogai ta na vematayakeyakeni, begaidi 'awasasanina i tauyeniga 'waideye 'aiata 'aitamogana 'aitamogana ma emiavo 'wa na ve'ivaivaita, 'wainega yami vetumagana i na vetoketoke. 'Ai'edi kebu, voke sakona nuami i na 'ewadi i na vekaliemi bola matami wata tanigami i na 'ive'uludi kebu bonana 'wa na nogai. ¹⁴“Tutuyanina ta velamu taunida ta tauyeda Iesu 'waineye yada vetumagana toketokena, bega 'ai'edi ta na tokemaigedaga yada vetumagananina kebu i na mwea i na nagoga 'eba ve'a'ava 'waineye, nika naninidi 'atumaidi i 'eno'enovi Keliso 'waineye ta na veluagadi. ¹⁵^bAva'ai 'akonadi a voneyeniga 'wa na nuani a vo,

'Ai'edi 'asiau Yaubada yana vona 'wa na nogaiga,

Kebu tanigami 'wa na 'ibodadi, 'wa na nogai 'wa na tononi.

Tubumiavo kebu 'wa na salad fai basenadi i yabayaba sali'avu'avuye tanigadi i 'ibodadi wata yau yadi Yaubada i vedumwe'ai'aieku.”

^y 3:7-11 Same 95:7-11; 3:7-8 Sou 17:7; Num 20:2-5 ^z 3:11 Num 14:21-23 ^a 3:14 Ibu 3:6

^b 3:15 Same 95:7-8

¹⁶ ‘Egavo Yaubada yana vona i nogai i vedumwe'ai'aieni? Tomotoganidi Mosese i 'edakumesedi 'awalawa Itifita 'wainega. ¹⁷We'e malamala 40 nagedie, egavo 'waidie Yaubada i nuasako? Tomotoganidi i sakona sali'avu'avuye bega bei i ve'alawafawafa. ¹⁸Tutuyanina Yaubada i vona'awaufaufa i vo, Kebu tamu sai'afo i na luku 'awalawanina a tauyeniga 'waineye bega i na veawai 'waikuye,” egavo faifaidi i vonavona? 'Asa'aiana tomotoganidi taunidi tovemata'wana'wana. ¹⁹Bega ta 'asetai kebu 'adi fata i na luku mia 'atumaina 'waineye fai kebu mogitana ma yadi vetumagana taunidi i da tauyedi Yaubada 'waineye.

**Ta na vematayakayaka bega ta na veawai
Yaubada yana 'eba mia 'waineye.**

4 ¹Basenadiotoga Yaubada i vona'awaufaufa i vo, 'Ami fata 'wa na luku yaku 'eba mia 'waineye bei ta na veawai.” 'Eba veawainina Yaubada i 'idewaiga tubudavo faifaidi, siwe kebu 'waineye i da luku. We'e yana vona'awaufaufanina veawai faifaina bola i 'eno'eno, begaidi ma yada kololo taunida ta na 'i'isave'avinida i na nunago tamu 'waimiega Yaubada i na voneni i na vo, Kebu 'amu fata 'u na luku 'eba veawainina 'waineye.” ²'Ida 'akonadi Valanina 'Atumaina ta nogai, bani'odi basenadi tomotoganidi Mosese yana tutuye i nogai siwe kebu i da 'ivaisedi fai nogaya'ava kebu i da vetumaganeni. ³^dWe'e 'ida ta vetumagana Iesu 'waineye 'ada fata ta na luku Yaubada taiadi ta na veawai. Yana Vona yana Buki nageneye i 'eno'eno tomotoganidi kebu i da vetumaganaga faifaidi i vo,

Ma yaku nuasako a vona'awaufaufa a vo,

Kebu tamu sai'afo i na luku 'awalawanina a tauyeniga 'waineye bega i na veawai 'waikuye.”

Bani'odi i vona tobailanidi faifaidi siwe fwayafwaya 'ana 'idewavau 'waineye yana folova i ve'a'avaina i lulukamata nuanuana yana tomotoga taiadi i na veawai. ⁴^eTa 'asetai i veveawai bega i lulukamata fai yana Buki nageneye tamu vona 'Aiata Veawai faifaina i vo,

Yaubada nani matatabuna i 'idewadi 'aiata 6 nagedie,
'Ana ve-7 'waineye i veawai.”

⁵Mogitana i vona veawai faifaina siwe mulieta wata i vona tomotoganidi i bailaga faifaidi i vo,

Kebu tamu sai'afo i na luku 'awalawanina a tauyeniga 'waineye bega i na veawai 'waikuye.”

⁶Tomotoganidi nagami Valanina 'Atumaina i nogaiga kebu i da luku Yaubada 'waineye taiadi i da veawai fai yana nuanua kebu i da vematayakeyakediga. Kebu i da lukuga siwe Yaubada yana

^c 3:16-18 Num 14:1-3,26-33 ^d 4:3 Same 95:11 ^e 4:4 Nag 2:2

vona'awaufaufanina veawai faifaina bola i 'eno'eno bega tomotoga 'ifwaidi taunidi i tauyediga Yaubada 'waineye 'adi fata i na luku i na veawai. ^{7f}Ta 'asetai 'adi fata i na luku fai Yaubada tamu tutuya i tauyeni, tutuyanina 'ana wagava 'Asiau. Malamala fue di i 'a'avana wata Yaubada i veifufu tutuyanina faifaina Kini Devida 'wainega i vo,

'Ai'edi Yaubada yana vona 'wa na nogaiga, 'asiau,

Kebu tanigami 'wa na 'ibodadi, 'wa na nogai 'wa na tononi.”

⁸We'e bola Devida kebu i da tubugaga, Iosua taunina Mosese tutulina me Isileli i 'edakumesedi. 'Ai'edi tomotoganidi i da nawedi i da luku Yaubada yana 'eba veawai 'waineye, 'ako Devida Yaubada yana vonanina kebu i da lu'ivoneyeni i da vo, Yaku vona 'wa na nogai 'asiau,” fai 'akonadi taiadi i da veveawai. ⁹Siwe fai bani'odi i voneyedi, ta 'asetai tamu veawai i 'eno'eno Yaubada yana tomotoga faifaida, bani'odi Yaubada taunina i folova i 'a'avana mulieta i veawai-vagata. ^{10g}Bega 'ai'edi aitai i na luku i na veawai Yaubada 'waineye taunina yana folova 'wainega, i veveawaiga bani'odi 'akonadi Yaubada i veveawai yana folova 'wainega. ¹¹Fai Yaubada yana 'eba veawai i 'idewa-vagaseni, ma yada tokemaiga taunida ta na tauyeda bega ta na luku Yaubada 'waineye ta na veawai. Kebu nuanuaku tamu aitai 'waimiega i na vemata'wana'wana tubudavo bani'odi bega kebu i da luku 'eba veawainina 'waineye.

Yaubada yana Vona nigonigona.

^{12h}Yaubada yana Vona kebu mweanaga, wata kebu i na venani-'avo'avovo 'waideye, fai vevetafewana wata toketokena. Vonanina nigonigo-otogina kebu bani'odi kefata kainumu nigon ma vi'avi'aina. Kefatanina 'ana fata luluda 'adi tubwa i na 'etofuadi tuyafa i na veluagadi. We'e Yaubada yana Vona 'ana fata i na vagaluku yada nuanua wata 'anu'anunuda i na veluagadi, bega yada nuanua givagivadi matatabuna i na 'etovemagesedi. ¹³ⁱKebu 'ada fata tamu nani ta na giveni Yaubada 'wainega. Abame wata fwayefwayeye nani matatabuna mageseye, mataneye i 'eno'enovi. Tomotoga matatabuda yada nuanua i 'ise'isedi wata i nuanuanidi, faifaidi 'awaie ta na vonayavuga mataneye.

Yada Tovelomu 'ada vebae i 'asetadi.

^{14j}Fai 'awaie ta na vonayavuga Yaubada mataneye, yada vetumagana ta na yato-vagaseni Iesu Yaubada Natuna 'waineye, kumanina faifaina ta lulu'ivona. Iesunina 'ana fata i na 'ivaiseda vonayavuga 'waineye fai taunina yada Tovelomu Bwaikaotogina, i kumeta i luku abame, Yaubada 'waineye. ^{15k}Yada Tovelomunina 'eba sailubu tulina tulina i veluagadi Seitani 'wainega 'ida

^f 4:7 Same 95:7-8 ^g 4:10 Nag 2:2 ^h 4:12 1 Fit 1:23; Efe 6:17; Ve 2:12 ⁱ 4:13 Lom 14:12
^j 4:14 Ibu 10:23 ^k 4:15 Ibu 2:17

bani'odi siwe kebu i da sakonaga. Begaidi 'ana fata 'ada vebae i na 'asetadi wata 'ai'edi ta na be'uga sakona 'waineye 'alo vita ta na veluagadiga, 'ana fata i na 'ivaiseda. ¹⁶Faifainanina kebu ta na kolologa, ma yada venuafoufa'ala ta na vaganago Yaubada Bwaikaotogina 'waineye bega yada sakona faifaidi i na 'isanuakalikaleda wata tutuyanina nuanuada 'aivaita, kebu i na ve'ise'iseda, siwe ma yana nuakalikali i na vesauluva 'atumaina 'waideye.

Iesu yada Tovelomu Bwaikina ma yana veimea.

5 ¹Me Diu tovelomu 'aitamogana 'aitamogana taunidi tomotogaotoga ediavo bani'odi, kebu tulidiga siwe i vevenua'ivinedina ma yadi veimea tomotoga faifaidi i folofolova Yaubada 'waineye. Tovelomunidi tomotoga yadi nuakalikali i 'a'anivelenedi Yaubada 'waineye wata yadi 'aisaya i nikenikedi i kabukabunidi Yaubada mataneyeye bega dayagidiega yadi sakona i tavutavunidi. ²Tomotoganidi taunidi tovekali wata tobavu we'e tovelomunidi 'adi vebae i 'asetadi fai taunidi wata kebu toketokediga bega 'adi fata bonadi bikadiega i na 'ivaisedi. ³Fai tovelomunidi kebu toketokediga i sakosakona, taunidi wata faifaidi i vevelomu.

⁴Kebu tamu aitoi 'ana fata taunina i na silakai bega ma 'ana ve'ililibu i na vetovelomu. We'e mogitana nagami Yaubada i na venua'ivineni i na goleni mulieta 'ana fata tovelomu yadi folova i na 'ewai, bani'odi basenadiotoga Eloni i venua'ivineni i goleni.

⁵Wata bani'odi Keliso kebu taunina i da silakai bega ma 'ana ve'ililibu i da vetovelomu bwaikina. We'e mogitana nagami Yaubada i venua'ivineni i voneni i vo,

'Omu natuku,

'Asiau fai yau Tamamu veimea a velemu.”

⁶Wata tamu tutuya Yaubada i vona Keliso i na silakaiga faifaina i vo,

'Omu 'u na vetovelomu-vagata,

Ebelamo yana tutuye Melekisadeki taunina tovelomu,

'Omu wata bani'odi.”

⁷Basenadi Iesu i miamia fwayefwayeye ma matageuna i velu'ui bonana bwaikinega Yaubada 'waineye, kumanina 'ana fata i na 'ita'ita'ieni wafa 'wainega. Fai Iesu taunina tonuaobu wata Yaubada yana nuania i dumwebikedi bega bonana i nogai. ⁸Avinodi taunina Yaubada Natuna siwe veviga wata 'we'wela i veluagadi, 'waidiega 'aseti i 'ewai vematayakayaka faifaina. ⁹Veviganidi 'waidiega Yaubada Iesu yana veimea i 'imoso'ieni bega 'atumai'avana, 'ana fataotoga 'ida ta vevematayakeyakeniga i na 'ita'ita'ieda, 'ita'ita'inina miamia-vagaina. ¹⁰Wata fai Iesu 'ita'ita'i 'ana 'eda i 'idewai, Yaubada i goleni i vo,

¹ 4:16 Ibu 10:19 ^m 5:2 Ibu 4:15 ⁿ 5:3 Vei 16:6,24 ^o 5:4 Sou 28:1 ^p 5:5 Same 2:7;
Ibu 1:5 ^q 5:6 Same 110:4; Ibu 7:1,16-17 ^r 5:7 Luk 22:40-44

'Omu Tovelomu Bwaikimu,
Melekisadeki bani'odi.”

Ta na vewavawava ve vitadi ta na 'asetadi.

¹¹Nani 'ifwaidi i 'eno'enovi nuanuaku a da veifufuyedi 'waimie, Keliso yada Tovelomu Bwaikina faifaina. Siwe fai nuami kebu i da magetadi 'ami ve vitana 'waikuye. ¹²⁻¹³Basenadiotoga 'wa vetumagana Iesu 'waineye, i lubwainemi 'asiau yami 'asetai i da vebwaika, emiavo 'ifwaidi 'waidie 'wa da veve. Nika 'omi bola bavubavumi Yaubada yana Vona faifaina. Nuanuami tamu aitoi i na veve 'waimie bega naninidi safailidi 'waidiega yami 'asetai i velamuga Iesu faifaina, 'wa na luluwaituganidi. 'Omi bani'odi kwakwama mwedamwedalidi, nuanuadi susu'ava, 'ani'ani fa'alidi i baila. 'Ani'ani fa'alidi mogitana tulaidi faifaidi. Wata kwakwama bavubavudi, kebu i da 'asetai nani 'atumaidi wata sakoidi. ¹⁴'Vonanidi Iesu faifaina 'adi 'asetai vitadi bani'odi 'ani'ani fa'alidi, 'ai'edi 'waidie 'wa na vewavawava 'omi 'akonadi bani'odi 'wa taulai nuanuami 'ani'animidi fa'alidi, wata 'ami fata 'wa na nuani bega 'wa na 'asetai ava'aibe sakona wata ava'aibe sauluva 'atumaina.

Egavo Iesu i na baileniga 'wa da vo wata i da tutufwaseni.

6 ¹⁻²'Omi fai bola 'wa vekwamana-siasiai ava'ai nagami 'wa 'asetai Keliso faifaina 'asa'aiana bei 'wa miamia, begaidi i lubwaineda venidi safailidi 'waidiega ta na vaganago bega ta na vewavawava ve vitadi ta na 'asetadi. 'Asa'aiana nuanuami ve safaila'avadi, bani'odi sauluvanidi sakoidi 'waidiega wafa i sousouyediga ta na bailedi bega ta na vetumagana Yaubada 'waineye, ve bafitaiso tulina tulina faifaidi, nimayato tomotoga 'unu'unudie bega toketokena i na veluagai 'Anu'anunu 'Atumaina 'wainega, ve tovi-vaitugana faifaina, wata tosakona 'adi vematavuloga-vagata Yaubada 'wainega faifaina. Venidi 'atumaidi, siwe basenadiotoga 'wa 'asetai'avadi kebu ta na luluwaituganidi. ³I lubwaineda ta na vaganago ve 'adi 'asetai vitadi ta na 'ewadi, 'ai'edi Yaubada i na tauyeda.

⁴⁻⁵“Mogitana ta na vaganago yada 'asetai Keliso faifaina i na vebwaika bega kebu ta na vedumwe'ai'ai. Tomotoganidi Yaubada i 'ivaisedi nuadi i magetadi mulieta Natuna Iesu i na vedumwe'ai'aeniga, kebu wata tamu sai'afu 'adi fata i na nuaviladi. Taunidi wata Yaubada yana nuakalikali i vebaedi, 'Anu'anunu 'Atumaina i agedi toketokena i veledi, i 'asetai Yaubada yana Vona tomotoga 'ada 'eba 'aivaita, wata yana toketokena tutuya mulina faifaina i vebaedi. ⁶Naninidi 'atumaidi i veluagadi mulieta i na vedumwe'ai'aiga, yadi sauluvanina 'wa da vo Yaubada Natuna i

^s 5:12 1 Kol 3:1-3 ^t 5:14 Lom 16:19 ^u 6:4-6 Ibu 10:26-29

da tutufwatagi-vaituganeni 'ai lagalagana 'waineye, wata 'wa da vo tomotoga fuedi matadie i da sidibidibieni.

⁷Tovedumwe'ai'ainidi wata toveamatayakayaka faifaidi a na awatalatutula. 'Ai'edi tomotoga 'ani'ani i na bakulidi, tutuya fuedi i na 'wei'wei bega fwayefwayeye i na sususula, mulieta fwayafwayanina 'wainega tonibakula 'ani'ani 'atumaina i na veluagai. Wata bani'odi egavo Yaubada yana nuanua i vevematayakeyakedi vuagidi ta 'ise'isedi wata Yaubada yana nuakalikali i veveluagadi. ⁸We'e tomotoganidi Yaubada i vedumwe'ai'aieni bani'odi fwayafwaya sakoina. 'Ani'ani i na bakulidiga siwe kebu i na taboga, nani sakoidi 'aisedi i na tabo bani'odi tauwafa wata ulaulawa. Bakulanina i na tunuya i na 'alai i na sako-vagata. Wata bani'odi tomotoganidi Yaubada i na vedumwe'ai'aieniga sako-vagata i na veluagai 'wainega.

⁹De'e a vonavonaga tomotoganidi Yaubada i vedumwe'ai'aieniga faifaidi, we'e 'omi ekwavo a 'asetami 'akonadi 'ita'ita'i 'wa veluagai Yaubada 'wainega wata a nuani mogitana Yaubada yana nuanua 'wa 'i'idewadi. ¹⁰"Omi 'wa folofolovaga Yaubada faifaina wata emiavo tovetumagana 'waidie 'wa 'a'aivaita-vebogi, yami nuakalikali Yaubada 'waineye 'ana 'eba 'isa. Yaubada yana nuanua tonovidi, yami sauluvanidi 'atumaidi i nuanuanidi 'awaie 'ami tutula 'wa na veluagai 'wainega. ¹¹"Mogitana 'akonadi taunimi 'wa tauyemi Yaubada 'waineye, siwe nuanuaku bwaikina 'asa'aiana bani'odi i na nagoga 'eba ve'a'ava 'waineye bega naninidi 'wa nuaniga mogitana 'wa na veluagadi Yaubada 'wainega, i na velemini. ¹²Kebu nuanuaku 'wa na dumwe'ai, nuanuaku tovetumagana toketokedi 'wa na saladi. Tomotoganidi ma yadi vetumagana wata ma yadi tokemaiga i lulukamata bega naninidi Yaubada i vona'awaufaufa i na velediga 'akonadi i veveluagadi.

Yaubada yana vona'awaufaufa vona-vagata.

¹³⁻¹⁴^xMogitana ta na vetumagana Yaubada yana vona'awaufaufa 'waidie bani'odi basenadi Ebelamo i vetumagana. Basenadiotoga Yaubada i vona'awaufaufa Ebelamo 'waineye, siwe kebu tamu aitoi 'ana wagava i da 'inanai bega yana vona'awaufaufanina i na vetoketoke. Fai kebu tamu aitoi bwaikaotogina taunina bani'odi bega taunina 'ana wagava i 'inanai i vo, Yau a vona'awaufaufa mogitana a na vesauluva 'atumaina 'waimuye wata 'amu wauma i na vebwaika." ¹⁵Vona'awaufaufanina 'waineye, Ebelamo i vetumagana-vagata i lulukamata mulieta vona'awaufaufanina 'ana mogitana i veluagai, natuna Aisake i tubuga, kumanina 'wainega i nagoga nika wauma i vebwaika.

¹⁶'Ai'edi tamu tomogo nuanuana yana vona'awaufaufa i na kiavetoketokei tamu tomogo bwaikaotogina, kebu taunina bani'odi, 'ana

wagava i na 'inanai bega tomotoga matatabudi i na 'asetai yana vona, vona mogitana bega kebu wata tamu aitoi i na kwayegeni. ¹⁷Yaubada nuanuana tomotoganidi yana vona'awaufaufa 'ita'ita'i faifaina i na veluagaiga i na 'asetai-atumaia kebu wata yana nuanua i na sivilai, bega taunina 'ana wagava i 'inanai, yana vona'awaufaufanina i kiavetoketokei. ¹⁸We'e yana vona'awaufaufa wata 'ana 'eba kiavetoketoke taunina 'ana wagava, naninidi 'adi 'ailuga kebu 'ana fata i na bailedi wata nuanua tulina i na souyeni. Kebu tamu sai'afo Yaubada i na vekali. Fai ta 'asetai kebu 'ana fata yana vona'awaufaufa 'waideye i na geuya, 'ida ta ve'ilabibina 'waineye nuafouda i kiavevatudi bega ta nuani mogitana veawai wata 'ita'ita'i ta na veluagadi. ¹⁹⁻²⁰^aAi'edi kaukau waka i na bewebeweniga tomotoga lomu i na taweni waka i na sitagoni wata tomotoga nuafoudi i na watu. 'Ida wata bani'odi, fai ta nuani mogitana Yaubada yana vona'awaufaufa 'ada 'ita'ita'i faifaina kebu i na geuyaga, 'wa da vo yada nuanua 'adi lomu i luku Yaubada 'waineye, toketokena wata vitana nuafouda i watu. Fwayefwayeye me Diu yadi tovelomu bwaikina Tutudaba Tabutabuotogina 'ana saiboda kaleko i sisibaleni i lukuluku Yaubada mataneye i vevelu'ui tomotoga faifaidi. Wata bani'odi Iesu faifaida 'akonadi i luku abame, Yaubada yana 'eba mia 'waineye. Taunina Tovelomu Melekisadeki bani'odi, i vetovelomu bwaikina i na mia-vagata, i kumeta Yaubada 'waineye i vevelu'ui faifaida.

Tovelomu Melekisadeki ifuifufuna.

7 ¹De'e Melekisadeki a na veifufuyeni 'wa na 'asetai. Taunina 'atamana Salema 'ana Kini wata Yaubada Bwaikaotogina yana tovelomu. Basenadiotoga Ebelamo i lugavia Kini 4 ma yadi 'aila'avo taiadi i leodi, i vilai i mimaiga Melekisadeki taiadi i veluaga, Melekisadeki i velu'ui Yaubada 'waineye bega i na vesauluva 'atumaina Ebelamo 'waineye. ²Kukuanidi Ebelamo i 'ewadiga vetalaga 'wainega i 'idewadi 'etokwau 10, 'aitamogana Melekisadeki i veleni. Melekisadeki 'ana saivila Veimea Tonovidi, bega taunina Veimea Tonovidi 'adi Kini. Yana 'atamana Salema 'ana saivila Mia 'Atumaina, bega taunina Mia 'Atumaina 'wainega i sousouyeni 'ana Kini. ³^bTaunina kebu tamanaga, kebu inanaga, kebu tubunavoga, yana 'eba velamu kebu, wata yawaina 'ana 'eba ve'a'ava kebu. ^cYaubada Natuna taunina Tovelomu Miamia-vagaina, wata Melekisadeki bani'odi.

⁴Wa na nuani, tomogonina kebu tomogo-'avo'avovo, taunina bwaikaotogina. Ebelamo tomogo bwaikina ma 'ana ve'ililibu wata me Isileli matatabudi 'wainega i souyedi, siwe i 'asetai Melekisadeki

^y 6:18 Num 23:19 ^z 6:19-20 Vei 16:2; Ibu 9:3 ^a 7:1-2 Nag 14:17-20 ^b 7:3 Ibu 7:15-17
^c 7:3 'Ana 'asetai voke kebu tamu aitoi faifaidi i da kilumaga.

bwaikaotogina begaidi kukuanidi lugaviayega i 'ewadiga, 'lifwaidi i veleni. ⁵ ^dMulieta Ebelamo i wafa tubuna tamu 'ana wagava Livai i tubuga, 'ana wauma 'wainega tomotoga 'lifwaidi i vetovelomu Yaubada yana veimea 'wainega. Wata Yaubada i tauyedi taunidi ediavo ma fueдие me Isileli 'waidiega 'anivelena-maimaiga i 'ewa'ewadi. Ediaonidi wata Ebelamo tubunavo siwe tutuya fueди 'ani'ani wata kukua i 'i'idewadi 'etokwau 10, kwau 'aitamogana tovelomunidi i 'ewa'ewai. ⁶Melekisadeki kebu tomogo Isileli 'alo Livai 'ana wauma 'wainega, siwe ta 'asetai ma yana veimea fai kwau 'aitamogana i 'ewai Ebelamo 'wainega. Ebelamo mogitana tomogo bwaikina fai vona'awaufaufa i veluagai Yaubada 'wainega siwe Melekisadeki i velu'ui faifaina Yaubada i na vesauluva 'atumaina 'waineye. ⁷Akonadi ta 'asetai tovonanuakalikali tomogo bwaikina we'e nuakalikalinina 'ana to'ewa sai'afo. Ebelamo tomogo bwaikina siwe fai Melekisadeki i vona nuakalikali 'waineye, bega taunina tomogo bwaikaotogina. ⁸Tovelomu tomotoga taunidi ediavo i vonevonedidi 'ani'ani wata kukua i 'i'idewadi 'etokwau 10, kwau 'aitamogana i veveleledi mulieta i wafawafa. We'e Melekisadeki faifaina Yaubada yana Buki i vonaga kwau 'aitamogana i 'ewai Ebelamo 'wainega siwe bola ma yawaina i miamia.

⁹⁻¹⁰ Tutuyanina Ebelamo Melekisadeki taiadi i veluaga kukua kwau 'aitamogana i veleni, Ebelamo aisena Livai, bola kebu i da tubuga siwe 'wa da vo 'akonadi i da miamia Ebelamo tolobwaneye. Fai Ebelamo tolobwaneye Livai i miamia siwe 'asa'aiana 'wa da vo Livai i da 'anivelena Melekisadeki 'waineye. Livai 'ana wauma taunidi tovelomu, kumanidiavo to'ewanidi kwau 'aitamogana 'etokwau 10 'waidiega, we'e Melekisadeki 'wa da vo i da 'ewai Livai 'wainega, begaidi ta 'asetai Melekisadeki bwaikaotogina kebu Livai 'ana wauma taiadi bani'odiga.

Iesu taunina bani'odi Melekisadeki.

¹¹ Basenadiotoga Mosese yana tutuye Yaubada veimea i 'anivelenedi me Isileli 'waidie we'e tovelomu kumanidiavo Livai 'ana wauma 'wainega, veimeanidi i folovidi. 'Ai'edi tomotoga ta da ve'atumai Yaubada mataneye tovelomunidi yadi folova 'waidiega 'ako kebu tamu tovelomu tulina i da mai. Fai kebu ta da ve'atumaiga bega tamu Tovelomu Bwaikina, taunina Keliso i mai, siwe kebu Livai tubuna Eloni bani'odiga, taunina mogitana Melekisadeki bani'odi. ¹²⁻¹⁴ ^eFai Yaubada tamu tovelomu i vetunei bega wata yana veimea tovelomu faifaidi i 'ive'ivauidi. Basenadi Mosese yana veimea 'wainega Livai 'ana wauma i vetovelomu we'e Iuda 'ana wauma 'wainega kebu i da tauyedi bega i na vetovelomu 'alo i na vetofolova Yaubada faifaina 'eba velomu 'waineye. Siwe 'akonadi ta 'asetai

^d 7:5 Num 18:21 ^e 7:13-14 Mad 2:6

tovelomunina tamu, taunina 'ada Toveimea Keliso i souyeni Iuda 'ana wauma 'wainega, begaidi veimeanidi Yaubada i 'ive'ivaudi.

¹⁵A vonavonaga Tovelomu tamu wata veimea 'ivaudi faifaidi, 'akonadi 'wa nuani Tovelomunina Keliso, taunina bani'odi Melekisadeki, 'ana 'asetai safailina 'waimie. ¹⁶^fTomotoga 'ifwaidi i vetovelomu fai Livai 'ana wauma 'wainega, we'e Keliso i vetovelomu fai taunina toketokeotogina wata miamia-vagaina. ¹⁷Ta 'asetai taunina miamia-vagaina, fai faifaina Yaubada yana Buki nageneye i vo,

'Omu 'u vetovelomu-vagata
Melekisadeki bani'odi.”

¹⁸⁻¹⁹^gVeimeanina tuatuaina tovelomu faifaidi i 'ewayavuleni fai mweana wata i venani-'avo'avovo, veimeanina kebu 'ana fata i na 'ivaiseda bega ta na ve'atumai Yaubada mataneye. We'e 'eda'eda 'ivauna 'akonadi Yaubada i 'idewai 'atumaiotogina kebu tuatuaina bani'odi, 'waineye ta vetumagana fai ta nuani mogitana 'ada fata ta na vaganago Yaubada lilivaotogineye Keliso 'wainega.

**Yaubada yana vona'awaufaufa 'ada To'ita'ita'i
faifaina kebu yana nuanua i na sivilai.**

²⁰^hTutuyanina Yaubada Iesu i silakai i na vetovelomu, kebu i da vonamo, nagami i vona'awaufaufa 'waineye i na vetovelomu-vagata. We'e tomotogaotoga i vetovelomuga, faifaidi kebu i da vona'awaufaufa. ²¹Iesu i vetovelomuga faifaina Yaubada yana vona'awaufaufanina i kiavetoketokei taunina 'ana wagavayega i voneni i vo,

Yau 'Auvea Yaubada a vona'awaufaufa 'waimuye,
Kebu wata yaku nuanua a na sivilai,
Bega 'omu 'u vetovelomu-vagata.”

²²ⁱFai de'e bani'odi Yaubada i vona'awaufaufaga 'ada fata yada vetumagana ta na yato-vagaseni Yaubada yana Veakutagona 'Ivauna 'waineye fai Iesu, kumanina yada Tovelomu-vagata, i 'idewai faifaida. Veakutagonanina i 'idewaiga 'atumaiotogina, kebu bani'odi Veakutagona Nagami. ²³Basenadi tovelomu fuei siwe i veve'auveana i wafawafa wata 'ifwaidi i lukuluku i tutulidi. ²⁴We'e Iesu fai taunina miamia-vagaina, bega i vetovelomu-vagata kebu tutulinaga, 'asa'aiana 'aisena. ²⁵^jBega egavo nuanuadi 'waineamo i na nago Yaubada 'waineye Iesu 'ana fata i na 'ita'ita'iotogedi fai taunina miamia-vagaina bega tutuya fuei i vevelu'ui Yaubada 'waineye faifaidi.

²⁶^kIesu magemagetana, kebu yana sakonaga 'atumai'avana, kebu tosakona taiadi i da miamiani Yaubada i vemia'eni i silakai abama

^f 7:16-17 Same 110:4 ^g 7:18-19 Gal 2:16; Lom 8:3-4 ^h 7:20-21 Same 110:1
ⁱ 7:22 Ibu 8:6 ^j 7:25 Lom 8:34; 1 Ion 2:1 ^k 7:26 Ibu 4:15

tabwaotogineye taiadi i miamia. Fai abame i miamia 'atumai'avana taunina mogitana yada tovelomu 'ana fata 'aivaita tulina tulina i na veleveleda, kebu tamu tutuya i na 'ailove. ²⁷Wata taunina tovelomu 'ifwaidi kebu bani'odiga. Tovelomu bwaikidi Livai 'ana wauma 'wainega 'aiata 'aitamogana 'aitamogana i lukuluku 'aisaya i nikenikedi i kabukabunidi Yaubada 'waineye, nagami taunidi yadi sakona faifaidi, mulieta yadi tomotoga faifaidi bega i na ve'atumai mataneye. We'e Iesu kebu bani'odi i da vesauluvediga, fai taunina 'atumai'avana bega kebu taunina faifaina i da velomu, 'ida 'aiseda faifaida i velomu. Yana velomunina tutuya 'aitamogana siwe tutuya matatabuna faifaina, wata kebu 'aisayayega i da velomu, i velomuga taunina tomogona i 'aniveleneni wafa 'waineye yada sakona 'adi nuatavuna faifaidi. ²⁸ Mosese yana veimea 'wainega tomotogaotoga Livai 'ana wauma 'wainega i vetovelomu bwaikidi siwe kebu toketokediga bega i be'ube'u sakona 'waidie. Tutuya manamanawena i nagoga mulieta Yaubada yana vona'awaufaufa toketokena 'wainega Natuna i venua'ivineni i silakai i vetovelomu bwaikina. I vetovelomuga, yana wafa 'wainega Yaubada Iesu yana veimea i 'imoso'ieni bega 'atumai'avana, 'ana fataotoga i na 'ita'ita'ieda, yana veimeanina miamia-vagaina.

Iesu taunina yada Tovelomu Bwaikina.

8 ¹ Ava'ai 'akonadi a veifufuyediga lamudi side. Mogitana 'ida ma yada Tovelomu Bwaikina bani'odi 'akonadi a vona. Taunina Iesu, i miamia abame, ma yana veimea Yaubada 'Ai'aiwabuotogina 'ana 'atagiega i miabui i miamia. ² Basenadiotoga me Isileli vanuga 'eba velu'ui i 'idewai 'aisaya bunudiega, we'e abame tamu vanuga i 'eno-vagata, taunina 'Auvea 'ana 'a'aiyogona. Vanuganina vevetabuna, Yaubada yana vanuga mogitana, nageneye yada Tovelomu Bwaikina Iesu i folofolova faifaida.

³ Fwayefwayeye tovelomu bwaikidi 'aitamogana 'aitamogana ma yadi veimea bega tomotoga yadi nuakalikali i 'a'anivelenedi Yaubada 'waineye wata 'aisaya i nikenikedi i vevelomuyedi 'waineye, tomotoga yadi sakona 'adi nuatavuna faifaidi. Begaidi yada Tovelomunina Iesu i lubwaineni tamu nani i na 'aniveleneni, naninina taunina tomogona. ⁴ We'e 'ai'edi Iesu i da miamia fwayefwayeye, 'ako kebu i da vetovelomuga, fai veimea i mai Mosese 'wainega 'aisedi Livai 'ana wauma i tauyedi i na vetovelomu, i vevelomuga yadi veimeanina 'waineamo. ⁵ Basenadiotoga Mosese i laka 'Oya Sainai Yaubada taiadi i veifufu. Bei i veni yana vanuga abame 'ana 'isa'isa, bega tutuyanina Mosese i velamu Yaubada

¹ 7:27 Ibu 10:10; Efe 5:2 ^m 7:28 Ibu 5:1-2,9 ⁿ 8:1-2 Ibu 1:3, 10:12 ^o 8:5 Sou 25:40; Kol 2:17

yana vanuga 'eba velu'ui i na yogoni 'aisaya bunudiega i voneni i vo, 'U na 'a'aiyogonaga, nuanuaku vanuganina basenadi 'oyeye a vemuga 'u na vetutuyameni, nani matatabuna 'u 'isediga wata bani'odi 'u na 'idewadi." Tutuyanina i 'ivetabodai, vanuganina Yaubada yana vanuga abame 'anununa, bega tovelomu bei i lukuluku i folofolova Yaubada 'waineye. ⁶PMogitana i folofolova Yaubada 'waineye, we'e Iesu folova bwaikaotogina i 'idewai taunidi kebu bani'odiga. Wata bani'odi Yaubada yana Veakutagona 'Ivauna Iesu i 'idewai tomotoga 'waideye 'atumaiotogina, kebu bani'odi basenadi Mosese i 'idewai me Diu 'waidie. We'e Veakutagonanina 'Ivauna Yaubada i 'idewai vona'awaufaufa 'atumaiotogidi 'waidiega, kebu bani'odi yana Veakutagona Nagami 'ana vona'awaufaufa.

Yaubada i vona'awaufaufa Veakutagona 'Ivauna i na 'idewai.

⁷Veakutagonanina Nagami Mosese i 'idewaiga, 'wainega tomotoga kebu i da ve'atamai Yaubada mataneye fai yana veimea kebu i da vematayakeyakediga. 'Ai'edi 'atumai'avanaga, 'ako tamu kebu Iesu i da 'idewaiga. ⁸¶Fai yana tomotoga kebu i da ve'atumaiga, bega Yaubada i awavesakoyedi i vo,

Yau 'Auvea a vona,

Sai'afoga, tamu tutuya 'waineye yaku Veakutagona 'Ivauna a na 'idewai me Isileli wata me Iuda 'waidie.

⁹Yaku Veakutagonanina 'Ivauna kebu bani'odi Veakutagona Nagami a 'idewaiga tubudiavo 'waidie.

Tutuyanina tubudiavo nimadie a 'abi a 'edakumesedi a miedi Itifita 'wainega, bei yaku Veakutagona a 'idewai 'waidie.

Yaku Veakutagonanina i vedumwe'ai'aieni i geuya, Begaidi a bailedi."

¹⁰Wata 'Auvea Yaubada i vona i vo,

Tutuya mulina 'waineye yaku Veakutagona 'Ivauna a na 'idewai me Isileli 'waidie bega i na vematayakeyakeni.

Veakutagonanina side bani'odi.

Yaku veimea a na yatodi yadi nuanua 'waidie bega ava'ai nuanuaku i na 'idewadiga i na 'asetadi.

Wata nuadie a na kilumidi bega i na nuakalikaliedi.

We'e yau yadi Yaubada, taunidi yaku tomotoga.

¹¹'Kebu tamu aitoi iana wata enavo 'ifwaidi i na vonedi i na vo, 'Auvea Yaubada 'wa da 'asetai,"

Fai tomotoga matatabudi 'akonadi i na 'asetaku, tomotoga bwaikidi wata tomotoga siaidi.

¹²Yadi vekali faifaidi a na 'isanuakalikaliedi,
We'e yadi sakona kebu wata a na nuanuanidiga.”

¹³Fai yana Veakutagonanina i goleni Veakutagona 'Ivauna, ma'itufa Veakutagona Nagami i venani-'avo'avovo. We'e fai 'akonadi i vetuatuai wata i venani-'avo'avovo sai'afoga i na savovola.

Veakutagona Nagami 'ana veimea.

9 ¹Basenadi Yaubada veimea i yatodi yana Veakutagona Nagami faifaina, bega me Isileli bani'odi i na tatafalolo, wata veimeanidi 'waidiega taunidi yadi 'eba velu'ui i 'idewai. Veimeanidi 'ifwaidi side bani'odi. ²Tomotoga vanuga i 'idewaiga Yaubada faifaina 'aisaya bunudiega, nageneye tutudaba 'ailuga. Tutudaba nagami 'ana wagava Tutudaba Tabu, nageneye mageta wata talalia, tabwaneye beledi Yaubada 'ana 'anivelena. ³I vaganagoga saiboda kaleko, tutudaba 'ana veluga faifaina. Tutudabanina 'ana wagava Tutudaba Tabutabuotogina. ⁴Nageneye 'eba velomu golida bei vane i kabukabuni Yaubada 'waineye wata didiwaka tomogona matatabuna golida 'ana loi. We'e didiwakanina nageneye kileu bababadi 'ailuga, basenadi Veakutagona Nagami 'ana vona bei i kilumidi. Wata nageneye 'aivoe golida ma 'ani'aninina 'ana wagava mana, kumanina Yaubada me Isileli i veledi sali'avu'avuye, wata Eloni yana wautogana, wautogananina basenadi bwavuna siwe i veluilili. ⁵Didiwakanina tabwaneye kumaea 'ailuga i dabidi anelose 'adi 'isa'isa, fafediega didiwaka tabwana i ve'i'wa'uya. Kumaeanidi 'adi wagava Selebimu, 'eba 'isa Yaubada magemagetana bei i miamia. Didiwakanina 'ana kudu 'waineye tovelomu dayaga i luluiतालनी bega Yaubada tomotoga yadi sakona i nunuatavunidi. Siwe 'asa'aiana kebu ta na veifufu-veduleyeni.

⁶“Tutuyanina Yaubada yana vanuga 'eba velu'ui 'ana kukua taiadi i 'idewa'a'avadi, 'aiata 'aitamogana 'aitamogana tovelomu i lukuluku tutudaba nagami 'waineye, yadi folova tulidi tulidi i 'i'idewadi Yaubada 'ana subia faifaina. ⁷We'e tutuya 'aitamogana malamala 'aitamogana 'aitamogana tovelomu bwaikina 'aiseotogina i lukuluku Tutudaba Tabutabuotogina 'waineye. I lukulukuga 'aisaya dayagidi i lukulukuvani Yaubada yana 'eba mia i luluiतालनी bega taunina wata tomotoga yadi sakona i bavuyediga 'adi nuatavuna faifaidi. ⁸Folovanina tovelomu bwaikina i 'idewaiga yada 'eba 'isa, 'wainega 'Anu'anunu 'Atumaina i veda basenadi kebu tamu tomogo-'avo'avovo 'ana fata i na luku Yaubada 'waineye Tutudaba Tabutabuotogina nageneye fai Veakutagona Nagami, 'ana vanuga taiadi bola i 'eno'enovi wata yada 'eba luku Yaubada

^s 9:2 Sou 25:23,30-31,37 ^t 9:3-5 Sou 37:1-29 ^u 9:6 Num 18:2-3 ^v 9:7 Sou 30:10
^w 9:8 Ibu 10:19-20

'waineye, bola Iesu kebu i da 'idewaiga. ⁹*Fai tutuyanina 'waineye tomotoga kebu 'adi fata i na lukuluku Yaubada 'waineye, vona-awatabai 'ida tomotoga tutuya de'e faifaida, fai ta 'asetai avinodi yadi nuakalikali i 'a'anivelenedi Yaubada 'ana subia faifaina, wata 'aisaya i vevelomuyedi yadi sakona 'adi nuatavuna faifaidi siwe tosubianidi 'adi vebae 'waidie vita i lulutonovi yadi sakonanidi faifaidi, kebu 'ana fata matatabuna i na ve'a'avai. ¹⁰Yadi nuakalikali wata yadi velomu i 'a'anivelenedi Yaubada 'waineye siwe 'waidiega tomogodi 'aisedi i ve'atumai. Veimeanidi 'ani'ani, 'aisaya, ufa wata 'ilekoa tulina tulina faifaidi Yaubada i yato-vagasedi i nagoga Keliso i mai, nika yana Veakutagona 'Ivauna i velamu.

Veakutagona 'Ivauna Keliso 'wainega.

¹¹Mogitana 'akonadi Keliso i mai, taunina Tovelomu Bwaikina Yaubada yana Veakutagona 'Ivauna i 'idewai, 'wainega mia 'atumaina ta veveluagai. Fwayefwayeye, bei tovelomu i lukuluku i folofolovaga, vanuga 'eba velu'uinina tomotoga 'adi 'a'aiyogona. We'e Keliso kebu bei i da folofolovaga, i luku Yaubada yana 'eba mia 'atumaiotogina abame, bei i folofolova. 'Eba mianina kebu fwayafwaya 'ana nani, abame i 'eno'eno 'atumai'avana wata yana 'ai'aiwabu bwaikaotogina, vanuga 'eba velu'ui fwayefwayeye kebu bani'odiga. ¹²Y Tutuyanina bei Iesu i lukuga, kebu 'aisaya goti wata bulumakau natudiavo dayagidi i da lukuveniga bega 'eba mianina i da luitaitali. We'e tutuya 'aitamogana, tutuya matatabuna faifaidi Iesu i wafa dayagina i ilolo 'ada tuveobu miamia-vagaina faifaina, 'wa da vo taunina dayagina i da lukuveni Tutudaba Tabutabuotogina 'waineye velomu faifaina. ¹³Basenadiotoga Mosese veimea i yatodi tomotoga tomogodi i na 'ivevunavunagidi Yaubada mataneye faifaidi. Tamu side bani'odi. 'Ai'edi egavo towafa i na 'abitonovi 'akonadi i veyoke, bega tovelomu 'aisaya dayagidi wata bulumakau natudi i velomuyeniga 'aufafana 'waidiega i luluiitalidi nika i veve'atumai Yaubada mataneye. Sauluvanina tomotoga tomogodi 'adi 'ivevunavunaga faifaidi, we'e nuadi kebu. ¹⁴Mogitana tomotoga tomogodi 'aisedi faifaidi 'aivaita i veluagadi 'aisaya dayagidiega, we'e Keliso dayagina kebu bani'odi 'aisaya dayagidi. Taunina 'atumai'avana kebu yana sakonaga siwe 'Anu'anunu Miamia-vagaina yana toketokena 'wainega taunina i tauyeni Yaubada 'waineye i wafa faifaida. Keliso dayagina kebu tomogoda 'aisedi faifaidi, we'e mogitana wata nuada i 'ivevunavunagidi Yaubada mataneye. Fai yada sakona 'adi tutula wafa, bega vita ta vevebaeda, siwe Keliso dayagina vitanidi i 'ewayavuledi wata nuada i 'ivevunavunagidi bega 'ada fata ta na vetofolova Yaubada Miamia-vagaina 'waineye.

x 9:9 Ibu 10:1-2 y 9:12 Efe 1:7-8 z 9:13 Vei 16:3; Num 19:17-18; Ibu 10:4

a 9:14 1 Fit 1:18-19; 1 Ion 1:7

Keliso Veakutagona 'Ivauna i 'idewai taunina dayaginega.

¹⁵ ^bFai Keliso dayaginega nuada i 'ivevunavunagidi bega ta 'asetai 'asa'aiana taunina Veakutagona 'Ivauna 'ana to'idewadewa bega tomotoga i na veiana Yaubada taiadi. Egavo Veakutagona Nagami yana tutuye i sakona, 'wa da vo sakananidi i da yogonidi siwe Keliso ma fueda i tuveobuda yana wafa 'wainega bega egavo Yaubada i venua'ivinediga 'adi veuveuta 'ai'aiwabu miamia-vagaina i na veluagadi yana vona'awaufaufa bani'odi.

¹⁶⁻¹⁷ Tamu yada sauluva side bani'odi. 'Ai'edi aitoi i na nuanua yana wafa faifaina, tamu lubulubu i na kilumi 'ana 'uyua 'ana to'ewa faifaidi. Ma yawaina i na miamiaga to'ewanidi 'adi wagava i kilumidiga kebu 'adi fata 'uyuanidi i na 'abitonovidi, nagami tomotoga fuedi i na 'asetatumaia tomogonina i wafa, mulieta to'ewanidi 'adi veuveuta i na 'ewadi. ¹⁸ 'Ada veuveuta Yaubada yana 'ai'aiwabu magemagetadi kebu ta da 'ewa-matayo'odi, nagami Iesu i wafa, wata bani'odi 'ai'edi 'aisaya kebu i da luvewafai bega dayaga i da ilolo, 'ako Yaubada yana Veakutagona Nagami kebu i da souyeniga. ¹⁹ ^cTutuyanina 'waineye Mosese Yaubada yana veimea 'aitamogana 'aitamogana i lu'ivoneyedi tomotoga 'waidie, mulieta bulumakau natudiavo dayagidi wata ufa i 'ewa'ewadi, tomotoga wata veimeanidi 'adi buki i luitaitalidi. 'Eba luitaitala tamu welavi 'ana wagava Isofa i baia sifi vutuvutudi i fania, vutuvutunina nagami i lusabai yamoyamoinega. ²⁰ I luluiitalidi bega i vonavona i vo, Dayaga de'e 'wainega Yaubada yana Veakutagona 'ana mogitana i velamu, nani matatabuna faifaidi i vona'awaufaufaga 'waimie i na 'idewadi, we'e 'omi yana veimeanidi i velemiga 'wa na vematayakeyakedi." ²¹ I 'a'avana, wata vanuga 'eba velu'ui 'ana kukua matatabuna taiadi i luitaitalidi. ²² ^dVona mogitana, sai'afo nani matatabuna dayaga 'wainega i vevunavunaga Yaubada mataneye yana veimea bani'odi. Fai yada sakona 'adi tutula wafa, 'ai'edi dayaga kebu i da ilologa kebu 'ana fata nuatavuna ta da veluagai Yaubada 'wainega.

Keliso dayaginega Yaubada yada sakona i nuatavunidi.

²³ Naninidi Mosese i 'idewadiga, tomotoga wata vanuga 'eba velu'ui 'ana kukua taiadi 'waidie, i 'ivevunavunagidi 'aisaya dayagidiega. Naninidi yada 'eba 'isa 'anunu bani'odi, we'e naninidi 'adi mogitana abame. 'Aisaya dayagidi kebu 'ana fata naninidi 'adi mogitana abame i na 'ivevunavunagidi, we'e fai Keliso dayagina nani 'atumaotogina, 'wainega naninidi i 'ivevunavunagidi. ²⁴ ^eVanuga 'eba velu'ui fwayefwayeye tomotoga 'adi 'aiyogona Yaubada yana 'eba mia abame 'anununa.

^b 9:15 1 Tim 2:5; Ibu 8:6 ^c 9:19-20 Sou 24:6-8 ^d 9:22 Vei 17:11 ^e 9:24 1 Ion 2:1

Tutuyanina Keliso i tovoi wafayega kebu i da luku tomotoga 'adi 'a'aiyogona 'waineye, we'e mogitana i luku abama nagefouneye, bei Yaubada mataneye i miamia faifaida. ²⁵Malamala 'aitamogana 'aitamogana me Diu yadi tovelomu bwaikina i lukuluku Tutudaba Tabutabuotogineye, siwe dayaganina i lukulukuveniga kebu taunina dayaginaga, 'aisaya dayagidi. We'e Keliso kebu tutuya fuedi i da lukuluku abame, tutuya 'aitamogana taunina i velomuyeni Yaubada 'waineye. ²⁶'Ai'edi taunina i da vevelomuyeniga malamala 'aitamogana 'aitamogana, 'ana 'aseta wata i da wafawafa-vebogi fwayafwaya 'ana 'idewavau 'wainega i da maiga 'asiau. We'e mogitana tutuya 'ana 'eba ve'a'ava 'waineye i souyenina wata i wafa-vetamogai tutuya matatabuna faifaina. Yana wafanina 'wainega taunina i velomuyeni faifaida bega sakona i 'ewayavuledi. ²⁷fBasenadiotoga Yaubada yana veimea i yatoi tomotoga matatabuda ta na wafa-vetamogada, mulieta ta na vonayavuga mataneye i na veimeyeda tutula faifaidi. ²⁸Wata bani'odi Keliso i wafa-vetamogai, tomogona i velomuyeni bega tomotoga fueda yada sakona i ve'a'avadi. Bola wata i na souya-vaituganeni, kebu sakona 'ana 'ewayavula faifaina i na maiga, we'e mogitana i na souyeni bega 'ida ta lulukamataga faifaina, 'ita'ita'i ta na veluagai 'wainega.

'Aisaya dayagidi kebu 'ana fata sakona i na 'ewayavuledi.

10 ¹^hAwaie nani fuedi 'atumaidi ta na veluagadi Iesu 'wainega, we'e Yaubada yana veimeanidi i maiga Mosese 'wainega kebu mogitana naniotogidi, 'anunudi. Fai veimeanidi 'adi wagava 'anunu, kebu 'ana fata velomu 'wainega sakona i na 'u'umidi. Tomotoga nuanuadi Yaubada i na subiai bega malamala 'aitamogana 'aitamogana 'aisaya i vevelomuyedi 'waineye kebu i da 'a'ailovega 'adi kwalakwala, siwe 'waidiega kebu i da ve'atumaiotoga Yaubada mataneye. ²'Ai'edi Yaubada 'ana tosubianidi i da ve'atumai-vagata mataneye, vita i vevebaediga yadi sakona faifaidi i da 'a'ava wata velomu i da 'ailove. ³Fai yadi sakona i vevebaedi bega malamala 'aitamogana 'aitamogana i vevelomu, 'waidiega i 'asetadi bola ma yadi sakona. ⁴Yadi sakonanidi bola i 'eno'enovi fai 'aisaya goti wata bulumakau dayagidi kebu 'ana fata sakona i na 'ewayavuledi. ⁵⁻⁶ⁱFai 'aisaya dayagidi kebu 'ana fata sakona i na 'ewayavulediga bega sai'afoga Keliso i na obuma fwayefwayeye, i vona Yaubada 'waineye, vonanina Yaubada yana Buki 'waineye i kilumi i vo, Tomotoga i 'a'anivelena-maimaiga 'ani'ani tulina tulina 'waidiega wata 'aisaya i vevelomuyediga 'waimuye, siwe kebu nuanuamu.

Wata 'aisaya kabulagolagodi i 'a'anivelenediga 'waimuye 'eba velomu 'wainega, yadi sakona 'adi nuatavuna faifaidi,

^f 9:27 Nag 3:19 ^g 9:28 Ibu 10:10; 1 Fit 2:24; Fil 3:20 ^h 10:1 Kol 2:17
ⁱ 10:5-7 Same 40:6-8

Siwe faifaidi kebu 'u da sosoanaga.

Begaidi tomogoku 'u 'idewai tomia fwayafwaya bani'odi bega a na 'aniveleneni yamu 'eba sosoana.

⁷Bega a vo, Yaubada, yau side,

Yamu nuanua matatabuna a na 'idewai,

Bani'odi basenadi i kilumi faifaiku yamu Buki 'waineye.”

⁸Yaubada yana veimea tulina tulina velomu faifaina i mai Mosese 'wainega siwe nagami Keliso i vo, Tomotoga i 'a'anivelenena-maimaiga 'ani'ani tulina tulina 'waidiega wata 'aisaya i vevelomuyediga 'waimuye, wata 'aisaya kabulagolagodi i 'a'anivelenediga 'waimuye 'eba velomu 'wainega, yadi sakona 'adi nuatavuna faifaidi, siwe naninidi kebu nuanuamu wata faifaidi kebu 'u da sosoanaga.” ⁹Mulieta Keliso i vo, Yaubada, yau side, yamu nuanua matatabuna a na 'idewadi.” Begaidi ta 'asetai velomu tuatuaina 'ana 'eda'eda Yaubada i 'ewayavuleni ma'itufa 'eda'eda 'ivauna i 'idewai, 'eda'edanina Keliso yana wafa faifaida. ¹⁰Jesu Keliso Yaubada yana nuanua matatabuna i 'idewai, tomogona i 'anivelenena-maimaigeni i wafa faifaida. I wafa-vetamogai tutuya matatabuna faifaidi bega i 'ive'atumaida Yaubada mataneye.

Keliso dayagina 'ana fata sakona i na 'u'umidi.

¹¹Tovelomu fue di 'aiata 'aitamogana 'aitamogana i tovo tovoi i folofolova vanuga 'eba velu'ui nageneye. Tutuya fue di i vevelomuga, folovanina i 'i'idewa-vebogia siwe 'waidiega kebu tamu sai'afo sakona i da 'u'uma-yavuledi. ¹²^kWe'e Keliso tutuya 'aitamogana i velomu sakonanidi faifaidi yana 'anivelenanina tutuya matatabuna faifaina 'ana fata, yana folovanina i 'a'avana i nago i miabui Yaubada 'ana 'atagiega. ¹³^lBei ma yana veimea i lulukamata i na nagoga mulieta Yaubada 'ana gaviavo i na leodi i na 'a'avana Keliso i na veveimeyedi. ¹⁴Yana velomunina 'aitamogana 'wainega 'ida 'atumai'avada Yaubada mataneye kebu tamu yada sakonaga, bega tutuya matatabuna 'ida Yaubada yana tomotoga magemagetada.

¹⁵^mVona mogitana ta ve'atumai Yaubada mataneye, wata faifaina 'Anu'anunu 'Atumaina yana ve 'waideye ta 'iseni Yaubada yana Buki nageneye i vo,

¹⁶^lAuvea Yaubada i vona i vo,

Tutuya tuatuaina i na 'a'ava, mulieta yaku Veakutagona 'Ivauna a na 'idewai bega i na vematayakeyakeni. Veakutagonanina side bani'odi.

Yaku veimea a na yatodi nuadie bega i na nuakalikaliadi,

Wata yadi nuanua 'waidie a na kilumidi bega ava'ai nuanuaku i na 'idewadiga i na 'asetadi.”

¹⁷Wata mulieta i vo,

Yadi sakona wata yadi vekali kebu wata a na nuanuanidiga.”

¹⁸Fai yada sakonanidi 'akonadi Yaubada i nuatavunidi kebu wata i na nuanuanidiga, velomu sakona 'adi nuatavuna faifaina ma'itufa i 'a'ava.

Ta na vaganago Yaubada lilivaotogineye.

¹⁹°Ekwavo, fai Iesu i wafa faifaida, 'ada fata ma yada sosoana wata ma yada venuafoufa'ala ta na luku Yaubada mataneyeye yana 'eba mia Tabutabuotogina nageneye. ²⁰°Basenadi Tutudaba Tabutabuotogina sisibodana kaleko 'wainega, tomotoga kebu 'adi fata 'waineamo i na lukulukuga, we'e 'asiau Yaubada yada 'eba luku 'ivauna wata miamia-vagaina i 'idewai Iesu yana wafa 'wainega 'ana fata mataneyeye ta na luku. Tutuyanina Iesu tomogona i 'aniveleneni wafa 'waineyeye saibodanina vanuga 'eba velu'ui 'waineyeye i 'anilabu'i, yada 'eba 'isa Iesu 'waineamo 'ada fata ta na luku Yaubada 'waineyeye. ²¹Wata Iesu yada Tovelomu Bwaikina, 'ida Yaubada yana 'Aila'a 'alo yana Vanuga 'ada To'isave'avina. ²²°Fai yada Tovelomu Bwaikina i miamia bega i lubwaineda ta na vaganago Yaubada lilivaotogineye. Iesu dayaginega nuada i lekoadi bega vita ta vevebaedaga yada sakona faifaidi i 'ewayavuledi, wata tomogoda i lekoadi ufa vunavunagina 'wainega. Kebu ta na venuanaluga siwe ta na nuani mogitana wata ma yada vetumagana fa'alina ta na luku mataneyeye. ²³°Akonadi Yaubada i vona'awaufaufa 'awaie 'ita'ita'i ta na veluagai 'wainega begaidi yada vetumagana ta yato-vagasedi vona'awaufananina 'waineyeye, kumanina faifaina ta lulu'ivona. Fai kebu 'ana fata Yaubada yana vona'awaufananina 'waideye i na geuya, ma yada tokemaiga ta na lulukamata. ²⁴Wata edavo ta na nuanuanidi wata i na nuanuanida, ma fueda ta na ve'ivaivaita, ta na vevesauluva 'atumaina wata ta na vevenuakalikali. ²⁵Tovetumagana 'ifwaidi i baibaila, kebu nuanuadi ma fueda ta na vava'auta tafalolo faifaina, we'e 'ida kebu wata tafalolo ta na bailaga, i lubwaineda ta na vava'auta bega ma fueda ta na ve'ivaivaita. Mogitana ta na tokemaigeda fai ta 'iseni Iesu yana vila-vaitugana 'ana 'aiata sailafoga.

Yada sauluva ta na 'i'isave'avinidi i na nunago Iesu ta na vagavefwayafwayai.

²⁶°Ai'edi Yaubada yana nuanua tonovidi ma 'adi 'aseta 'waideye bega ta vetumagana 'waidie mulieta sauluvanidi 'akonadi ta 'asetadi sakona, siwe ta na 'i'idewadiga, wata aitoi dayagina i na ilolo bega sakonanidi Yaubada i na nuatavunidi? Wata kebu tamu. ²⁷Vona mogitana kebu

° 10:19 Ibu 4:16 ° 10:20 Mad 27:51 P 10:22 1 Ion 1:7; Efe 5:26 ¶ 10:23 Ibu 4:14
r 10:26-29 Ibu 6:4-8

'ana fata nuatavuna ta na veluagai, ta na kololo bwaikina ava'ai 'awaie i na souyediga 'waideye vonayavuga 'ana tutuye. Bei Yaubada 'ana tovedumwe'ai'ai vematavuloga i na veluagai 'ai-'ala'alata 'waineye i na 'alaogodi. ²⁸Veimeanidi i maiga Mosese 'wainega, 'ai'edi aitoi i na vedumwe'ai'aiediga, tomotoga 'adi 'ailuga 'alo 'adi 'aitonu tomotoganina i na 'iseni i na lu'ivoneyeni, kebu tamu sai'afu i na 'isanuakalikali i na luvewafaimo. ²⁹'We'e 'wa da nuaniga 'ai'edi tamu tomogo i na sakosakona bega Yaubada Natuna i na vagavefwayafwayaiga, 'ana vematavuloga bani'odi? Iesu dayagina Yaubada yana Veakutagona 'Ivauna 'wainega tomogonina yana sauluva i tonova Yaubada mataneyeye siwe i na venani-'avo'avovoga, bani'odi? Wata 'Anu'anunu 'Atumaina 'wainega nuakalikali i 'ewaiga siwe i awavesakoyeniga, bani'odi? Mogitana i lubwaineni vematavuloga bwaikaotogina i na veluagai Yaubada 'wainega. ³⁰"Fai Yaubada ta 'asetai i vo,

Yau tomotoga 'adi vematavuloga a na veledi,

Yadi sakona faifaidi wata yau a na tutula."

Wata i vo,

Yau 'Auvea yaku tomotoga a na veimeana vematavuloga i na veluagai."

³¹Vona mogitana 'ai'edi Yaubada Miamia-vagaina ta na baileni 'ada vematavuloga ta na veluagai nimaneye, naninina faifaina ta na kololo-'afu'afu.

Vita fuedi 'waidie ta na tovoi fa'alina.

³²Naninidi basenadi i souyediga 'waimie 'wa na nuanidi. Tutuyanina 'waineye Yaubada yami nuanua i kiavemagetadi Iesu 'ana 'asetai faifaina, vita tulina tulina 'wa veluagadi siwe kebu 'wa da be'uga 'wa tovofovi fa'alina. ³³Tutuya 'ifwaidi 'aila'a matadie i awavesakoyemi wata i 'ivekokovimi, we'e tutuya 'ifwaidi emiavo 'ifwaidi tovetumagana vitanidi bani'odi i veveluagadi 'wa 'isanuakalikaliedi 'wa 'i'ivaisedi 'omi 'adi 'auvo. ³⁴'Egavo i vetumagana begadi i miamiani vanuga 'eba yogona 'waineye, ma yami nuakalikali 'wa fofogedi. Wata to'ivekokovanidi ve'isakololo 'wainega yami vanuga wata yami kukua i luluelomiga, kebu 'wa da nunuasakoga 'wa sosoanamo fai 'wa 'asetai 'a'a'avidu we'e nani fuedi 'atumaiotogidi Yaubada 'wainega i 'eno-vagata 'waimie.

³⁵Mogitana nagami 'wa vetoketoke vitanidi 'waidie bega tutuya de'e 'wa na totokemaiga bega tokemaiganina 'wainega tutula 'atumaiotogina 'wa na veluagai Yaubada 'wainega. ³⁶"I lubwainemi 'wa na vetoketoke bega 'ami fata Yaubada yana nuanua 'wa na 'i'idewadi, 'waidiega ava'ai

^s 10:28 VeL 17:6 ^t 10:29 Mad 26:27-28 ^u 10:30 VeL 32:35-36; Lom 12:19

^v 10:34 Mad 6:20 ^w 10:36 Ibu 6:12

i vona'awaufaufa i na velemiga 'wa na veluagadi. ³⁷*Ma yami tokemaiga 'wa na miamia fai Yaubada yana Buki nageneye i vo,

Kebu tutuya manamanawenaga kumanina i mimaiga sai'afoga i na le'wa,

Kebu i na 'ivogavogana.

³⁸†Ai'edi aitoi yana sauluva 'atumai'avana matakuye, yana vetumagana 'wainega i na miamia,

We'e 'ai'edi i na baila ma yana kololo i na vilaiga, faifaina kebu a na sosoanaga.”

³⁹We'e 'ida kebu bani'odi, tomotoganidi i kololo i viladiga i na wafaotoga 'ai-'ala'alase. Mogitana 'ida ma yada vetumagana ta totokemaigeda bega 'ita'ita'i ta veluagai.

Vetumagana faifaina.

11 ¹†Vetumagana side bani'odi. Naninidi nuanuada kebu ta da veluagadiga siwe ta 'asetai-'afo'afoi 'awaie ta na veluagadi, wata ava'ai kebu ta da 'ise'isediga siwe ta nuani mogitana ta na veluagadi, yada nuanuanina 'ana wagava vetumagana. ²Basenadiotoga 'ifwaidi tubudavo ma yadi vetumagana fa'alina, bega yadi vetumagananidi 'waidiega Yaubada i awave'atumaiedi.

³†Fai ta vetumagana Yaubada 'waineye ta 'asetai fwayafwaya, abama wata nani matatabuna i 'idewadi yana vona 'wainega, we'e ava'ai 'asiau ta 'ise'isediga, 'waidiega i 'idewadi kebu 'ada fata ta na 'isediga.

Me Isileli tubudiavo Ebeli, Inoki wata Noa yadi vetumagana ifufuna.

⁴†Tomotoga 'ifwaidi ma yadi vetumagana side bani'odi. Basenadiotoga Ebeli i vetumagana Yaubada 'waineye begaidi yana 'anivelena-maimaiga 'aisaya sifi i velomuyeni Yaubada 'waineye, faifaina Yaubada i sosoana bega i awave'atumaieni. We'e tatana Keni yana 'anivelena-maimaiga 'ani'ani, bega Yaubada kebu i da sosoana wata i da awave'atumaieniga. Fai Ebeli tovetumagana, tutuyanina Yaubada i awave'atumaieniga wata i vo, Taunina tomogo yana sauluva tonovidi matakuye.” Avinodi Ebeli i wafa siwe yana vetumagana ifuifufuna i 'eno'eno 'asiau yada 'eba 'isa.

⁵†Wata Inoki i vetumagana Yaubada 'waineye bega kebu i da wafaga, Yaubada i vagavaiamo i naweni 'waineye, tomogona i luala-wayogeni. Bola kebu i da lakaga, faifaina Yaubada i awave'atumaieni i vo, A sosoana Inoki faifaina.” ⁶†Ai'edi kebu ma yada vetumaganaga wata kebu 'ana fata Yaubada i na sosoana faifaida. 'Ai'edi aitoi nuanuana i na nago Yaubada 'waineye i lubwaineni i na vetumagana Yaubada i miamia,

x 10:37-38 Aba 2:3-4; 10:37 Ve 22:20 y 10:38 Lom 1:17 z 11:1 2 Kol 5:6-7

a 11:3 Nag 1:1 b 11:4 Nag 4:3-5 c 11:5 Nag 5:24

wata i lubwaineni i na vetumagana Yaubada i vevesauluva 'atumaina tomotoganidi i lulualeniga 'waidie.

^{7d}Tamu wata tomogo 'ana wagava Noa i vetumagana Yaubada 'waineye bega ava'ai 'awaie i na souyediga faifaidi i matakia 'waineye yana vona i ve'ililibuyeni, ma yana kololo waka i yogoni. 'Wei wata mwai bwaikina bola kebu i da souyediga siwe i vematayakayakamo. Wakanina 'wainega ma yana 'aila'a 'ita'ita'i i veluagai mwai bwaikaotogina 'wainega. Tomotoga 'ifwaidi kebu i da vetumagana bega Noa yana vetumaganayega yadi sauluva sakoidi i sivemagesedi we'e yana vetumagananina faifaina Yaubada i vo, Noa yana sauluva tonovidi matakuye.”

Ebelamo yana vetumagana ifuifufuna.

⁸Basenadi Yaubada Ebelamo i goleni 'ana tuvada i na baileni i na nago 'ani'ie tamu 'awalawa 'waineye, 'awalawanina Yaubada i vona'awaufaufa Ebelamo i na veleni. Ebelamo Yaubada yana vona i vetumaganeni bega i vematayakayaka i tovoi i nago siwe bei i nunagoga kebu i da 'asetauga.

⁹Ma yana vetumagana i mia vona'awaufaufa 'awalawina 'waineye, siwe kebu yana vanugaga, vadavada i 'idewadi 'aisaya bunudiega, wakawaka bani'odi i miamia. We'e mulieta Yaubada vona'awaufaufanina i luvaitugani Ebelamo natuna Aisake wata tubuna Iakobo 'waidie, fwayafwayanina i na veledi, siwe taunidi Ebelamo bani'odi vadavada 'waidie i mia. ¹⁰Ebelamo i miamia vadavada 'waidie, fai i lulukamata nuanuana i na luku abame Yaubada yana 'atamana miamia-vagaina 'waineye. 'Atamananina nagami Yaubada yana nuanua 'waineye i venua'ivina-vagaseni mulieta i 'idewai.

^{11f}Ebelamo ma yana vetumagana bega avinodi i ve'auvea wata Sela kakalidi, siwe Yaubada yana toketokena 'wainega i venatuna. I venatunaga fai Yaubada yana vona'awaufaufa Ebelamo yana 'aila'a i na vefue, vonanina Ebelamo i vetumaganeni, i nuani mogitana i na 'idewai.

^{12g}Ebelamo i ve'auvea-'afo'afo sai'afoga i da wafa siwe fai i vetumagana, tomogonina 'aitamogana 'wainega 'aila'a bwaikaotogina i souyedi, lu'iwawa-wayoga wala'ai 'ana 'ilukulukuta bani'odi wata 'ubwana.

¹³Tomotoganidi faifaidi a vonavonaga, matatabudi ma yadi vetumagana i wafa. Bola ma yawaidie naninidi Yaubada i na velediga faifaidi i vona'awaufaufa, siwe kebu matatabuna i da veluagadi. Ma yadi vetumagana i nuanidimo mogitana 'awaie i na souyediga faifaidi i sosoanamo. I vonavona mali tomotoga 'waidie, fwayefwayeye kebu yadi vanuga taunidi wakawaka wata toyaba. ¹⁴Fai taunidi i fali-wakewakediga ta 'asetai taunidi yadi 'awalawa fwayefwayeye kebu faifaina i da nuanua we'e mogitana 'awalawa abame i nuanuani,

^d 11:7 Nag 6:13-22 ^e 11:8 Nag 12:1-5 ^f 11:11 Nag 15:6 ^g 11:12 Nag 15:5

faifaina i lulukamata. ¹⁵⁻¹⁶'Ai'edi 'adi tuvada faifaina i da nuanuaga 'adi fata wata i da viladi siwe yadi nuanua bwaikina tamu 'awalawa 'atumaotogina, 'awalawanina abame. Ebelamo ma yana 'aila'a nuanuadi Yaubada taiadi i na miamia, begaidi avinodi Yaubada bwaikaotogina siwe tutuyanina tomotoganidi i vo, 'Omu yama Yaubada,” taunina kebu i da bunumayagediga fai 'akonadi tamu 'atamana i 'idewa-vagaseni faifaidi abame.

¹⁷⁻¹⁸^hTamu tutuya Yaubada Ebelamo i silubuya nuanuana natuna i na velomuyeni 'waineye, Ebelamo kebu nuana i da loloi ma yana vetumagana i vematayakayaka. Avinodi Yaubada i vona'awaufaufa Ebelamo 'waineye yana 'aila'a i na vefue Aisake 'wainega, siwe Ebelamo igodi natuna yana tamogana i da luvewafai 'eba velomu 'waineye. ¹⁹Ebelamo i nuani mogitana bega i vo, 'Ai'edi natuku a na luvewafai a na velomuyeni Yaubada 'waineye, 'ana fata wata i na sivetovoia wafayega.” Sai'afoga i da luvewafai siwe Yaubada i talaboda bega 'wa da vo wafayega i da vevilai.

Aisake, Iakobo wata Iosefa yadi vetumagana ifuifufuna.

²⁰ⁱAisake i vetumagana Yaubada 'waineye bega i nuani mogitana tutuya mulina i na vesauluva 'atumaina natunavo 'waidie. Begaidi Iakobo wata Iso 'adi vona nuakalikali 'waineye, Aisake i velu'ui Yaubada 'waineye natunavonidi faifaidi.

²¹^jWata bani'odi Iakobo i vetumagana Yaubada 'waineye bega sai'afoga i na wafa yana wautoganayega i 'a'alive'avinana Yaubada i subisubiai, wata Iosefa natunavo 'adi vona nuakalikali faifaina i vevelu'ui bega Yaubada i na vesauluva 'atumaina 'waidie.

²²^kMulieta Iosefa i 'asetai sai'afoga i na wafa i vetumagana 'awaie Yaubada me Isileli i na viledi Itifita 'wainega, bega i vona-vagata i na tautauyaga luluna i na nawedi.

Mosese yana vetumagana ifuifufuna.

²³^lMosese tamana inana taiadi wata ma yadi vetumagana. Yadi tutuye Itifita 'ana kini yana veimea nuanuana kwakwama mwedamwedalidi iavetadi i na luluvewafadi siwe tutuyanina natudi i tubuga i 'iseni 'ana 'isa 'atumaotogina bega kebu i da kolologa kini yana veimeanina faifaina. I vetumagana Yaubada i na 'ita'ita'ieni bega i giveni vanuge, bei i miamia weta'i 'aitonu.

²⁴⁻²⁵^mMulieta me Itifita yadi kini natuna vevinena Mosese i veluagai i naweni yana vanuge i fayayeni. Mosese i taulai ma yana veimea

^h 11:17-18 Nag 22:9-12 ⁱ 11:20 Nag 27:27-29,39-40 ^j 11:21 Nag 48:15-16

^k 11:22 Nag 50:24-25 ^l 11:23 Sou 1:22, 2:1-2

wata yana 'ai'aiwabu fue di fai taunina bani'odi kini tubuna. Siwe i vetumagana Yaubada 'waineye bega kebu nuanuana tutuya 'ale'usana nageneye taiadi i na miamia i na sosoana-'avo'avovo wata i na sakosakona, nuanuana enavo Yaubada yana tomotoga, kumanidiavo i vetofolova-maimaiga me Itifita 'waidie, taiadi 'adi vita i na vesala. ²⁶Awavesako wata sidibidibi faifaidi kebu i da nuanua, i nuani 'ai'edi vita i na veluagai Yaubada 'ana Venua'ivina faifaina nani 'atumaina, fai i vetumagana 'awaie 'ana tutula miamia-vagina i na veluagai Yaubada 'wainega, 'ai'aiwabunidi bwaikaotogidi me Itifita yadi 'ai'aiwabu kebu bani'odiga.

²⁷Fai Mosese i vetumagana Yaubada 'waineye kebu i da kololo kini i na nuasakoga faifaina, i tovoi Itifita 'wainega i tauya i nago. Kebu i da vilai, ma yana tokemaiga i nago, Yaubada kumanina kebu tamu aitoi 'ana fata i na 'iseniga, 'wa da vo i da 'ise'iseni. ²⁸Wata fai i vetumagana Yaubada yana tomotoga me Isileli i na 'ita'ita'iedi, bega Yaubada yana vona i lu'ivoneyeni 'waidie, i vonedi 'aisaya sifi i na nikedi yadi saiboda lilivadi i na luitaitalidi dayagidiega. I luitaitalidiga bega Yaubada yana anelose i uvi'agalatagonidi kebu i da nikedi we'e me Itifita natudiavo tulaidi i luvewafadi.

Me Isileli yadi souyagi ifuifufuna.

²⁹Tutuyanina Mosese me Isileli i vagavaidi i souyedi Itifita 'wainega, me Itifita i tala'wavina mulidie. Fai me Isileli i vetumagana Yaubada 'waineye Eyaga Yamoyamoina i 'ivelalalai, 'waineamo i damana 'wa da vo fwayafwaya lalaneamo, we'e me Itifita igodi i da damana i na 'ive'avinidiga faifaina, nika matatabudi i yemuwafa.

³⁰Mulieta malamala fue di 'a'avana me Isileli i le'wai Kenani, 'awalawanina Yaubada i vona'awaufeufeniga 'waineye Yaubada yana veimea 'wainega nuanuadi 'atamana Ieliko i na kualo, bega Yaubada yana vonanina i vetumaganeni 'aiata 7 nagedie 'atamananina 'ana kali badubaduna wata manamanawena i luvivili. Fai ma yadi vetumagana lauvivila 'ana ve-7 'waineye kali i 'aniweali.

³¹'Bola 'atamananina kebu i da leodiga tamu vavine tolagogona 'adi wagava Leabi me Isileli yadi tovetau'i'wala i 'ivaisedi i givedi yadi vanuge. Fai i vetumagana Yaubada 'waineye, tutuyanina i tala'avuidiga vavinenidi 'atumai'avadi i miamia, kebu i da wafa Yaubada 'ana tovedumwe'ai'ai taiadi.

³²Tovetumagana fue di wata i miamiani siwe a nuani 'asa'aiana. 'Ai'edi wata nuanuaku, side tovetumagananidi a da veifufuyedi,

m 11:24 Sou 2:10 n 11:27 Sou 12:51 o 11:28 Sou 12:21-23 p 11:29 Sou 14:21-31
q 11:30 Ios 6:12-21 r 11:31 Ios 2:1-21, 6:25

Gidioni, Beleki, Samisoni, Iefeta, Devida, Samuela, wata Yaubada yana tolu'ivonavo. ³³⁻³⁴Tomotoganidi i vetumagana Yaubada 'waineye bega 'eba veimea 'ifwaidi taiadi i vetalaga i leodi, yadi veimea tonovidi, wata ava'ai Yaubada i vona'awaufaufaga 'waidie i veluagadi. Fai ma yadi vetumagana Yaubada 'waineye i 'ita'ita'iedi 'aisaya kasikasisidi laioni 'waidiega, 'ai-'ala'alata 'wainega, wata vetalaga 'waidie kebu tamu aitoi i da wafa kefata 'waidiega. Nagami kebu toketokediga siwe i vetoketoke i vemata'ai'ai vetalaga 'waidie bega mali tomotoga yadi tolugaviavo 'waidie i vetoketoke. ³⁵'We'e vevine 'ifwaidi yadi vetumagana 'wainega ediavo wafawafadi i yawasa.

We'e tomotoga 'ifwaidi i vetumagana Yaubada 'waineye siwe 'adi tovedumwe'ai'ai i 'ivekokovidi i wafa. Kebu nuanuadi Yaubada i na baileni bega tovedumwe'ai'ainidi i na 'etoyavudi vita 'waidiega, ma yadi tokemaiga i tauyedi veviga wata wafa 'waidie. I vetumagana i 'asetai 'awaie mia 'atumaina wata miamia-vagaina i na veluagai, yadi mia fwayefwayeye kebu bani'odiga. ³⁶"Ifwaidi 'adi gaviavo i sidibidibiedi wata i fitalidi, we'e 'ifwaidi i yogonidi bulava kainumu 'waidiega i yatodi vanuga 'eba yogona 'waineye. ³⁷Ifwaidi fai i vetumagana Yaubada 'waineye kileuyega i tutuvewafadi, 'ifwaidi soa 'wainega i bobolugedi, we'e 'ifwaidi i luvewafadi kefatayega. 'Ifwaidi i 'ivekokovidi wata vita i veledi, taunidi i vewekowekoma, i ve'wesena 'aisaya sifi wata goti bunudiega. ³⁸Taunidi tomotoga 'atumaiotogidi, kebu i da lubwainedi tomia fwayafwaya 'ifwaidi sakoidi taiadi i na miamia. Kebu yadi vanuga, i mimiayaba-vuvua sali'avu'avuye wata 'oyeye, yadi 'eba mia ovuye wata watu'ai 'waidie.

³⁹Tomotoganidi Yaubada i awave'atumaiedi yadi vetumagana fa'alidi faifaidi, we'e naninidi faifaidi i vona'awaufaufa i na velediga, fwayefwayeye kebu i da veluagadiga. ⁴⁰Kebu i da veluagadiga fai Yaubada nuanuana i na lukamata bega ma fuedeye yana nuanua 'atumaiotogina ta na veluagai, bega matatabuda yada sauluva magemagetadi mataneye.

Iesu Keliso yada 'eba 'isa.

12 ¹Tomotoganidi i vetumaganaga, 'aila'a bwaikina i tovfifineda i 'ise'iseda begaidi ma yada vetumagana ta na vetafewa Yaubada faifaina. 'Ai'edi tomotoga nuanuadi i na ve'ililidega nagami naninidi i vevesitagonidiga bani'odi kaleko manamanawedi, i na 'a'idi bega 'adi fata yadi 'eba lilide matadie i 'eno'enova faifaina i na vetafewa. 'Ida wata ta na vetafewa, nuanuananidi i sisitagonidaga wata sakona 'eba

^s 11:33 Dan 6:22; 11:34 Dan 3:23-27 ^t 11:35 1 Kin 17:17-24; 2 Kin 4:18-37

^u 11:36 Iel 20:2, 37:15-16 ^v 12:1 1 Kol 9:24-25

be'u matatabuna ta na bailedi, bega sauluvanidi Yaubada nuanuana 'waidiamo ta na nunago. ² *Ta na nunagoiga matada ta na yato-vagasedi Iesu 'waineye, kumanina yada vetumagana lamuna wata yana 'aivaita 'wainega yada vetumagananina i na vetoketoke-'afo'afo. Wafa 'ai lagalagana 'waineye 'eba veviga wata 'eba bunumayaga siwe Iesu i nagona kebu i da 'ailove, ma yana tokemaiga taunina i tauyeni wafa 'waineye, 'ana bunumayaga faifaina kebu i da nuanuaga fai i 'asetai 'awaie sosoana bwaikina i na veluagai. I wafana 'asiau ma yana sosoana wata ma yana veimea i miabui i miamia Yaubada 'ana 'atagiega.

³ *Vitanidi i veluagadiga 'wa na nuani. Tosakona i vedumwe'ai'aieni veviga i veleni siwe i tokemaigeni. Bega 'wa na nuanina 'ai'edi vita 'wa na veluagaiga faifaina kebu 'wa na 'abiawa wata kebu 'wa na 'ailove. ⁴ Iesu veviga i veluagadi fai sakona taiadi i vetalaga, mulieta 'ana gaviavo i luwewafai. We'e 'omi 'wa vevetafewa sakona 'waidiega, yami veviga sai'afo, kebu wafa 'wa da veluagai Iesu bani'odi.

'Ida Yaubada natunavo.

⁵ *Vona mogitana i lubwaineda ta na vevetafewa Yaubada faifaina 'alo voke nuami i fani tamu yana vona yana Buki nageneye? 'Ida natunavo i velu'ase'aseda i vo,

Natuku, 'ai'edi yamu 'Aueva vematavuloga i na velemuga tamu sauluva sakoina faifaina, 'u na nuave'avini.

I na lulumatanimuga, kebu yana vona faifaina 'u na logi.

⁶ *Egavo 'Aueva i nuakalikaliiediga vematavuloga i veveledi bega yadi sauluva i na tonova.

Wata tomotoganidi 'waidie i ve'awa-natuna i nikenikedi."

⁷ *Fai Yaubada Tamami i nuakalikaliemi bega vematavuloga i vevelemi, vitanidi 'waidiega 'wa na 'asetai 'omi natunavo mogitana. Kwakwama fuedi tamadiavo 'atumaidi siwe vematavuloga i veveledi yadi sauluva i na tonova faifaina, begaidi 'ai'edi vita 'wa na veluagadiga Yaubada Tamada 'wainega kebu 'wa na logi, 'ami 'aivaita. ⁸ Yaubada natunavo matatabudi vematavuloga i veveluagadi 'wainega, we'e 'ai'edi kebu, 'omi kebu natunavo mogitana, 'omi 'eda natudiavo. ⁹ Fwayefwayeye tamadavo vematavuloga i vevelede begaidi ta veve'ililibuyedi, we'e mogitana Tamada 'anu'anunuda faifaidi ma yada ve'ililibu taunida ta na tauyeda 'waineye bega yada mia i na ve'atumai. ¹⁰ Wata fwayefwayeye tamadavonidi tutuya 'ale'usana 'waidie vematavuloga i vevelede naninidi i nuanidiga 'atumaidi faifaidi, we'e Yaubada yana vematavuloga tonovidi 'ada 'eba 'aivaita bega yada sauluva i na tonova taunina

^w 12:2 Ibu 1:3, 3:1 ^x 12:3-4 Mad 27:28-44 ^y 12:5-6 Voa 3:11-12 ^z 12:6 Ve 3:19
^a 12:7 VeL 8:5

yana sauluva magemagetadi bani'odi. ¹¹Tutuyanina vematavuloga ta veveluagadiga 'eba nuavita 'waideye kebu 'wainega sosoana ta da veveluagai. Siwe 'ai'edi venidi ta na nuanuanidiga 'awaie vuagina ta na veluagai, mia 'atumaina wata sauluva tonovidi.

¹²Fai Yaubada i kikiavetonovida vita wata 'we'wela 'waidiega bega kebu ta na 'ivemweamweadaga. Nimami 'wa na tauvefatotodi wata 'wa na tovoi fa'alina kebu 'agemi i na tatava. ¹³Yaubada yana 'eda'eda tonovineamo 'wa na nunago kebu 'wa na baileniga bega 'ifwaidi yadi vetumagana mweadi 'wa da vo ve'agesako, kebu i na mwea-'afo'afo, yami 'aivaita 'wainega i na ve'atumai-vaitugana.

Ve wata matakia.

¹⁴^bWa na vewavawava bega yami mia i na ve'atumai, kebu tamu aitoi taiadi 'wa na ve'ikwayekwayega. Wata 'wa na vewavawava yami sauluva i na tonovaotoga bega 'ami fata 'Auvea 'wa na 'iseni, we'e 'ai'edi aitoi yana sauluva kebu tonovidiga, kebu 'ana fata i na 'iseni. ¹⁵^cTaunimi 'wa na 'i'isave'avinimi nika kebu tamu aitoi 'waimiega Yaubada yana nuakalikali i na 'ia'iaweniga. Wata 'wa na 'isa'isa kebu tamu sauluva sakoina i na vebwaika 'awasasamie, bani'odi viga sakoina yana damana tomotoga fueidi 'waidie, i na nunago matatabumi i na 'ivesakoimi. ¹⁶^dWata taunimi 'wa na 'i'isave'avinimi kebu tamu aitoi 'waimiega i na lu'avo'avovo bunu 'ana nuanua sakoidi 'waidie. Wata taunimi 'wa na 'i'isave'avinimi Yaubada yana nuanua kebu 'wa na bailedi bani'odi Iso. Fai taunina tulaina, tamana yana wafa 'waineye 'ana veuveuta i da veluagadi wata Yaubada yana vona'awaufaufa tamana Aisake 'waineye i da damana 'waineye, siwe 'ani'ani siaina faifaina veuveutanina i vekimwaneyeni taina Iakobo 'waineye. Kebu Yaubada yana nuanua faifaina i da nuanua, 'ani'ani 'aisena faifaina i nuanua. ¹⁷^eMulieta nuanuana veuveutanina 'ana vona'awaufaufa i na veluagai tamana yana vona nuakalikali 'wainega, siwe kebu 'ana fataga. 'Akonadi 'wa 'asetai ma matageuna tamana 'waineye i vevelu'ui igodi i na vevilai siwe kebu tamu 'eda i da 'eno'eno 'wainega 'ana veuveuta i na veluagai.

Yaubada i veianeda Veakutagona 'Ivauna 'wainega.

¹⁸^fYami nago Yaubada 'waineye kebu tubumiavo me Isileli bani'odiga. Basenadiotoga taunidi i nagoi 'Oya Sainai nani 'ifwaidi i 'isedi wata i nogaidi. Bei Yaubada i obuma, 'ai-'ala'alata, wawuwavulo bwaikina, wata dudubala i 'isedi. Kaukau bwaikina i nunuga, tomuyoana i kikianamali wata i dududuya. ¹⁹Tomotoganidi evulega butu'aina wata bona bwaikina

^b 12:14 Lom 12:18 ^c 12:15 Efe 4:31 ^d 12:16 Nag 25:33-34 ^e 12:17 Nag 27:32-40
^f 12:18-20 Sou 19:12-13,16-20, 20:18-21

i nogaidi, i kololo-'afo'afo i velu'ui Yaubada 'waineye kebu nuanuadi bonananina i na noganogai. ²⁰Kebu 'adi fata i na tokemaigedi fai Yaubada i vonavona i vo, 'Ai'edi tamu aitoi 'alo 'aisaya de'e 'oyanina 'waineye i na maiga 'wa na tutuvewafai kileuyega. ²¹'Oyanina 'ana 'isa maigikokololona bega Mosese i vo, Yau a kololo a tatatava.”

²²^gOmi kebu 'wa da nagoiga 'Oyanina Sainai Yaubada 'waineye we'e mogitana yami vetumagana 'wainega 'wa vaganagoi 'Oya Saioni, Yaubada Miamia-vagaina yana 'atamana. 'Atamananina abame i 'eno'eno 'ana wagava Ielusalema 'Ivauna, bei anelose fueotogidi ma yadi sosoana i va'auta i miamiani. ²³^hWata bei Yaubada natunavo i tubu'edakumetaga, kumanidiavo Keliso yana 'Aila'a, i vetumagana 'waineye bega 'adi wagava i kilumidi abame. Wata 'wa nagoi Yaubada 'waineye, taunina tomotoga matatabuda 'ada Toveimea vonayavuga faifaina. Wata bei towafa basenadi yadi sauluva tonovidi 'anu'anunudi i miamiani, 'akonadi 'atumai'avadi Yaubada mataneye. ²⁴ⁱWata 'wa nagoi Iesu 'waineye, taunina Yaubada yana Veakutagona 'Ivauna 'ana to'idewadewa bega 'wa veiana Yaubada taiadi. Wata bei Iesu dayagina i luitaitaleni, dayaganina 'wainega nuatavuna ta veluagai yada sakona 'waidiega, kebu bani'odi Ebeli dayagina. Tatana i luvewafaiga dayagina i vegole nuanuana mewa.

²⁵^jBegaidi 'wa na 'isa'isa, Yaubada kumanina i vonavona 'waimie, kebu 'wa na bailaga, bonana 'wa na vematayakeyakeni. Basenadi Yaubada tomotoga i matakiadi fwayefwayeye, mulieta egavo i baila kebu nuanuadi i na nogaiga kebu 'adi fata i na dega 'adi vematavuloga 'waidiega. We'e 'ida Yaubada yana Vona ta noganogai abamega begaidi 'ai'edi kebu ta na vematayakeyakeniga kebu tamu sai'afo ta na dega 'ada vematavuloga 'wainega. ²⁶^kTutuyanina Yaubada i vona 'Oya Sainai 'wainega fwayafwaya i yue, siwe tutuya de'e 'akonadi i vona'awaufaufa i vo, Tamu tutuya wata fwayafwaya a na yuei, siwe kebu fwayafwaya 'aisenaga, wata abama a na yuei.” ²⁷Fai i vo, Tamu tutuya,” ta 'asetai Yaubada 'ana 'idewadewa matatabudi i na fetoga i na 'ewayavuledi, we'e naninidi kebu i na fetoga 'aisedi i na 'eno'enovi.

²⁸Ta na vekaiwa Yaubada 'waineye fai 'ida ta luku yana 'Eba Veimea 'waineye, 'Eba Veimeanina kebu 'ana fata i na feto i na 'eno-vagata. Yaubada ta na kiavesosoani, ma yada ve'ililibu wata ma yada kololo ta na subisubiai. ²⁹^lI lubwaineda bani'odi ta na subisubiai fai yada Yaubada taunina 'ai-'ala'alata, 'wainega nani matatabuna i na 'ala'a'avadi.

Naninidi 'waidiega Yaubada i na sosoana faifaida.

13 ¹^mMa emiavo 'wa na vevenuakalikali fai matatabumi Keliso yana 'Aila'a. ²ⁿKebu nuami i na fani 'wa na nuanuani bega tomotoganidi

g 12:22 Ve 21:2, 5:11 h 12:23 Luk 10:20 i 12:24 Ibu 8:6; Nag 4:10 j 12:25 Ibu 2:1-3, 10:28-29 k 12:26 Sou 19:18 l 12:29 VeL 4:24 m 13:1 Ion 13:34 n 13:2 1 Fit 4:9

kebu 'wa da 'isa'inganadiga ma yami sosoana 'wa na goledi i na maia yami vanuge. Tomotoga 'ifwaidi bani'odi i munega anelose kebu i da 'isa'inganadiga siwe i goledi. ³°Ai'edi 'wa da miamiani vanuga 'eba yogona 'waineye nuanuami emiavo i da nuanuani i da fogefogemi, bega egavo vanuga 'eba yogona 'waineye i miamianiga 'wa na nuanuanidi 'wa da vo ma fuemie 'wa da luku. Wata bani'odi egavo vita i veveluagadiga tomotoga 'ifwaidi 'waidiega 'wa na nuanuanidi 'wa da vo 'omi wata vita 'wa da veveluagadi.

⁴I lubwaineda matatabuda nagi ta na ve'ililibuyeni. Iavetami kebu yami vevinevo 'wa na bailedi 'wa na lu'avo'avovo, wata bani'odi 'omi vevine yami lalamogavo 'wa na veve'ililibuyedi. Egavo taunidi i tauyedi bunu 'ana nuanua sakoidi wata ve'avula-'avo'avovo 'waidie Yaubada i na veimeyedi vematavuloga faifaina.

⁵°Taunimi 'wa na 'i'isave'avinimi bega mani 'ana nuakalikali kebu i na vebwaika 'waimie. Ava'ai 'akonadi 'waimie i 'eno'enoviga, siwe 'asa'aiana 'ami fata. Kebu fuedi faifaidi 'wa na nuanua fai 'akonadi Yaubada i vo, Kebu tamu tutuya a na bailemiga, Kebu tamu sai'afo a na 'iawe-lovemiga.”

⁶°Fai kebu i na 'iawe-lovedaga kebu ta na kololo 'alo ta na venuanaluga ta na vonavonamo ta na vo, 'Auvea 'aku To'aivaita, Kebu a na kolologa.

Naninidi sakoidi tomotoga i na 'idewadiga 'waikuye, kebu faifaidi a na nuanua.”

Yami to'edakumetavo bonadi 'wa na nogaidi.

⁷Yami to'edakumetavo nagami, 'wa na nuanuanidi, kumanidiavo Yaubada yana Vona i lu'ivona 'waimie. Basenadi yadi sauluva 'atumaidi wata yadi folova 'waidiega nani fuedi 'atumaidi i souyedi, naninidi 'wa na nuanuanidi wata yadi vetumagana 'wa na vetutuyamedi. ⁸°Iesu Keliso kebu i na vetuli, bogi, 'asiau, wata tutuya matatabuna i na nagoga siwe 'asa'aiana 'ana 'isa'isanina.

⁹°Taunimi 'wa na 'i'isave'avinimi i na nunago ve-vekavekali tulina tulina nuami i na 'ewadi i na vuyoyemi Yaubada yana 'eda'eda tonovina 'wainega. Yada nuanua Yaubada yana nuakalikali 'wainega i na kiavetoketokediga, i lubwaineni, we'e veimea 'adi ve'ililibu 'ani'ani faifaidi 'waidiega kebu ta na vetoketokega. Egavo veimeanidi i veve'ililibuyedigaga kebu 'aivaita i na veluagai 'waidiega.

¹⁰°Ida tovetumaganavo ma yada 'eba velomu, 'ai lagalagana bei Keliso i wafa siwe 'asa'aiana yada 'eba velomu. Egavo bola i

° 13:3 Mad 25:36 P 13:5 Ios 1:5; 1 Tim 6:8-10 ¶ 13:6 Same 118:6 † 13:8 Ve 1:17-18
s 13:9 Lom 14:17; 1 Kol 8:8

folofolova vanuga 'eba velu'ui tuatuaina 'waineye kebu 'adi fata 'aivaita i na veluagai yada 'eba velomunina 'wainega. ¹¹ 'Me Diu yadi tovelomu bwaikina 'aisaya dayagi'avadi i lukulukuvedi Tutudaba Tabutabuotogina nageneye i 'a'anivelenedi Yaubada 'waineye tomotoga yadi sakona 'adi nuatavuna faifaina. We'e 'aisayadi i nunawedi mwalilige bei i kabukabunidi. ¹² "Begaidi wata Iesu i wafa mwalilige bega tomotoga i 'ivevunavunagidi yadi sakona 'waidiega taunina dayagina 'wainega. ¹³ 'Fai i 'ivevunavunagida, sauluva tuatuaidi ta na baileidi 'wa da vo ta da nunagoi 'waineye mwalilige, bunumayaga wata saidibi ta na veluagai faifaina, taunina bani'odi i veluagai 'ai lagalagana 'waineye. ¹⁴ "Vitanidi ta na veluagadiga faifaina, kebu faifaiddi ta na nuanua fai 'ida kebu tamu yada 'atamana miamia-vagaina i da 'eno'enoga fwayefwayeye, bola ta lalauala Yaubada yana 'atamana faifaina, 'atamananina 'awaie i na souyeni.

¹⁵ *Begaidi Iesu 'wainega Yaubada ta na subisubiai kebu ta na 'ailove, yada subianina siwe 'asa'aiana yada 'anivelena-maimaiga 'waineye. Bonadega ta lulu'ivona faifaina bega subianina Yaubada 'waineye bonada vuagina.

¹⁶ 'Kebu nuami i na fani, tutuya fuedi 'wa na vevesauluva 'atumaina wata ma emiavo 'wa na veve'ivaivaita. Sauluvanidi siwe 'asa'aiana yami 'anivelena-maimaiga Yaubada 'waineye, faifaiddi i sososoana.

¹⁷ *Yami to'edakumetavo 'wa na vematayakeyakedi wata taunimi 'wa na tauyemi yadi veimea 'waidie. Tutuya fuedi i 'i'isave'avinimi kebu tamu tutuya i da 'ailove fai 'awaie yadi folovanina faifaina i na lu'ivona Yaubada 'waineye bega i na veimea tutula faifaina. 'Wa na vematayakeyakediga ma yadi sosoana i na folofolova, we'e 'ai'edi kebu, ma yadi nuavita i na folofolova siwe 'wainega kebu 'aivaita 'wa na veluagai.

¹⁸ Nuanuaku 'wa na vevelu'ui faifaiku. 'Aku vebae 'waineye a lutonovi yaku folova wata yaku sauluva matatabuna tonovi'avadi, nuanuaku bani'odi i na 'eno-vagata. ¹⁹ "Nuanuaku bwaikina 'wa na toke 'wa na vevelu'ui faifaiku bega Yaubada i na vetune-matayo'oku a na wai 'waimie.

Velu'ui tolu'iawawa faifaiddi.

²⁰⁻²¹ ^bA vevelu'ui faifaimi nuanuaku Yaubada, kumanina mia 'atumaina wata nuanua bikana 'adi to'anivelena, wata 'ada Toveimea

† 13:11 Vei 16:27 † 13:12 Ion 19:17 † 13:13 1 Fit 4:1,14 † 13:14 Ibu 11:16

× 13:15 Same 50:14,23 † 13:16 Fil 4:18 † 13:17 1 Tes 5:12 † 13:19 Lom 15:30

† 13:20 Ion 10:11,18; 1 Tes 5:23; 13:21 1 Fit 5:10; Fil 2:13

Iesu Keliso 'ana tosivetovoi, i na kiavetoketokemi bega 'ami fata yana nuanua 'wa na 'i'idewadi. Yana wafa 'wainega Iesu i veto'isave'avina bwaikina, bega 'ida yana sifi i 'i'isave'avinida, wata yana wafanina 'waineye dayagina i ilolo, 'wainega Yaubada yana Veakutagona 'Ivauna wata miamia-vagina i souyeni. Bega nuanuaku Iesu Keliso 'wainega Yaubada i na 'idewada nika yada sauluva matatabuna faifaidi i na sosoana. Iesu ma 'ana subia wata ma yana 'ai'aiwabu miamia-vagina, kebu i na 'a'avaga. Vona mogitana, yaku nuanua bani'odi.

Vona 'ana 'eba ve'a'ava.

²² Ekwavo, nuanuaku bwaikina 'wa na tokemaigemi, yaku velu'ase'ase de'e 'wa na nogai fai leta de'e a kilumiga faifaimi kebu manamanawenaga. ²³ Nuanuaku a na vonemi 'wa na 'asetai, iada Timoti 'akonadi i souyeni vanuga 'eba yogona 'wainega. 'Ai'edi i na le'wa-matayo'oga, taiadi 'a na wai 'a na fogemi.

²⁴ Yami to'edakumetavo 'waidie yaku vekaiwa 'wa na lu'ivona wata Yaubada yana tomotoga matatabudi 'waidie. Edavo 'awalawa Itali 'wainega yadi vekaiwa i vetunei 'waimie.

²⁵ Nuanuaku Yaubada ma yana nuakalikali i na vevesuluva 'atumaina 'waimie.

'Asa'aiana bani'odi.